

**VOT 71851**

**KAJIAN TAKHRIJ HADITH SAHIH BERKAITAN DENGAN IMAN YANG  
DIRIWAYATKAN OLEH IMAM BUKHARI DAN MUSLIM**

**WAN HASAN BIN WAN EMBONG**

**AMINUDDIN BIN RUSKAM**

**AHMAD KILANI BIN MOHAMED**

**RESEARCH VOTE NO :**

**71851**

Pusat Pengajian Islam dan Pembangunan Sosial (PPIPS)  
Universiti Teknologi Malaysia (UTM)

2003

## ABSTRACT

### **RESEARCH ON TAKHRIJ OF HADITH AL-SAHIH ABOUT ISLAMIC BELIEF AS NARRATED AND AGREED BY IMAM BUKHARI AND MUSLIM**

(Keywords : *hadith sahih, Bukhari and Muslim, iman* )

To be guided in this life, Muslims must always refer to the right references. The second authentic source in Islam is hadith. However the authenticity of hadiths were under severe scrutiny during the golden edge of Islam. Since the source had been manipulated by hadith fabricators. Hence, the importance of *takhrij al-hadith* emerge in order to solve the problem of separating between the authentic and fabricated hadith. This research is purposely done to collect hadiths on iman as narrated and agreed upon by Imam Bukhari and Muslim. These hadiths had been classified into various important subtopics. The data is stored in computer together with their translations for easy finding and reference.

Key Research:  
Wan Hassan Bin Wan Embong (Head)  
Aminuddin Bin Ruskam  
Ahmad Kilani Bin Mohamed

Email : Abawidad@hotmail.com  
Tel : 07-5535047  
Vote : 71851

## ABSTRAK

### **KAJIAN TAKHRIJ HADITH SAHIH BERKAITAN DENGAN IMAN YANG DIRIWAYATKAN OLEH IMAM BUKHARI DAN MUSLIM**

(Kata Kunci : *hadith sahih, Bukhari dan Muslim, iman* )

Merujuk kepada sumber-sumber yang betul, sangat penting diberi perhatian agar perjalanan hidup sentiasa berada dalam manhaj Illahi. Sumber kedua Islam iaitu hadith kini bercampur-aduk dengan pelbagai jenis hadith dan bukan hadith. Usaha mentakhrijkan hadith membolehkan pengguna memperolehi bahan yang dikehendaki itu dengan selamat. Kajian ini adalah bertujuan mengumpul hadith-hadith sahih yang berkaitan dengan iman. Objektif kajian adalah mengumpul hadith sahih yang telah diriwayatkan oleh Imam Bukhari dan disepakati oleh Imam Muslim. Hadith-hadith ini seterusnya dikategorikan mengikut tajuk-tajuk tertentu. Kemudian ia disimpan ke dalam pengkalan data komputer bersama-sama dengan terjemahannya sekali agar memudahkan pencarian dan penyalinan.

Penyelidik :

Wan Hassan Wan Embong (Ketua)

Aminuddin Bin Ruskam

Ahmad Kilani Bin Mohamed

Email : Abawidad@hotmail.com

Tel : 07-5535047

Vot : 71851

## HALAMAN KANDUNGAN

<b>BAB SATU</b>	<b>PENDAHULUAN</b>	
1.1	Latar Belakang	1
1.2	Pernyataan Masalah	2
1.3	Objektif Penyelidikan	2
1.4	Skop dan Batasan Penyelidikan	3
<b>BAB DUA</b>	<b>HADITH SAHIH, HASAN, DHAIF</b>	
2.1	Pengenalan	5
2.1.1	Hadith Sahih	5
2.1.2	Hadith Hasan	6
2.1.2.1	Ciri-ciri Hadith Hasan	
2.1.3	Hadith Dhaif	7
2.2	Pengertian Hadith Sahih	7
2.3	Pembahagian Hadith Sahih	9
2.3.1	Sahih Li Zatih	9
2.3.2	Sahih Li Ghairih	10
2.4	Syarat-syarat Penerimaan Hadith Sahih	11
2.4.1	Perawinya Bersifat Adil	11
2.4.2	Perawinya Mempunyai Ingatan Yang Sempurna	11
2.4.3	Sanad Hadith Bersambung Dan Sentiasa Berturutan	12
2.4.4	Terhindar Daripada Syaz (Tidak Janggal)	13
2.4.5	Tidak Ber'illah	13
2.5	Taraf Hadith Sahih	13
2.6	Tokoh-Tokoh Hadith	14
2.7	Kitab-Kitab Hadith Sahih	15
2.7.1	Rasional Mengetahui Latar Belakang Perawi	15
2.7.2	Imam Al-Bukhari	16
2.7.2.1	Riwayat Hidup Imam Al-Bukhari	16
2.7.2.2	Latar Belakang Pendidikan Imam Al-Bukhari	17

2.7.2.3 Guru-Guru Imam Al-Bukhari	18
2.7.2.4 Keistimewaan Imam Al-Bukhari	19
2.7.2.5 Pandangan Ulama Terhadap Imam Al-Bukhari	21
2.7.2.6 Hasil Karya Imam Al-Bukhari	22
2.7.2.7 Sahih Al-Bukhari.	23
2.7.2.8 Jumlah Hadith Sahih Al-Bukhari	24
2.7.2.9 Tempoh Penulisan Sahih Al-Bukhari	24
2.7.2.10 Cara Penulisan	25
 2.7.3 Imam Muslim	 26
2.7.3.1 Riwayat Hidup Imam Muslim	26
2.7.3.2 Pendidikan Imam Muslim	27
2.7.3.3 Pandangan Ulama Terhadap Imam Muslim	27
2.7.3.4 Karya-Karya Imam Muslim	28
2.7.3.5 Kitab Sahih Imam Muslim	29
2.7.3.6 Bilangan Sahih Imam Muslim	29
 2.8 Hadith Sahih Yang Terdapat Dalam Sahih Imam Al-Bukhari Dan Muslim	 29
2.8.1 Kehujahan Hadith Untuk Beramal	30

**BAB TIGA** **PELAKSANAAN PROGRAM TAKHRIJ HADITH SAHIH AL-BUKHARI DAN SAHIH MUSLIM DALAM BAB IMAN DAN AQIDAH**

3.1 Pemilihan Bahan	34
3.2 Peralatan Yang Digunakan	34
3.3 Pelaksanaan Projek Takhrij	35
3.4 Pengeditan Takhrij	35

**BAB EMPAT** **HASIL TAKHRIJ HADITH SAHIH AL-BUKHARI DAN MUSLIM DALAM BAB IMAN DAN AKIDAH** 36

**BAB LIMA****KESIMPULAN**

45

**BIBLIOGRAFI**

47

## BAB SATU

### PENDAHULUAN

#### 1.1 LATAR BELAKANG

Perkembangan ilmu sentiasa berterusan dari semasa ke semasa dan ianya tidak akan lups sehinggalah berlakunya kiamat. Manusia sentiasa perlukan ilmu kerana ianya akan mendekatkan lagi diri seseorang itu dengan Penciptanya.

Maksud firman Allah S.W.T :

*“Diangkat oleh Allah S.W.T orang-orang yang beriman di antara Kamu dan orang-orang yang diberikan ilmu dengan beberapa darjat ”*

Al Mujadalah : 11

Islam merupakan agama yang mementingkan ilmu pengetahuan seperti yang ternyata di dalam wahyu pertama yang diturunkan oleh Allah S.W.T. :

Maksud firman Allah S.W.T :

*Bacalah (Ya Muhammad) dengan nama Tuhanmu yang Menciptakan (segala makhluk yang di alam ini. Bacalah dan pelajarilah kejadian itu dengan tuntunan Tuhanmu) Yang telah mencipta (menjadikan) manusia dari segumpal darah. Bacalah dan Tuhanmu Yang Amat Pemurah. Yang mengajar (manusia) dengan (perantaraan) kalam Yang mengajar manusia segala apa yang tidak (belum) diketahui.*

Al ‘Alaq : 1 – 5

Al-Qur'an dan al-Hadith merupakan dua sumber ilmu yang terdapat di dalam Islam. Segala ilmu yang bersumberkan nas-nas al-Qur'an dan al-Hadith dikenali sebagai ilmu naqli. Kebenaran yang terkandung di dalamnya merupakan kebenaran yang bersifat mutlak dan di luar jangkaan pengetahuan manusia.

Pengumpulan hadith-hadith Nabi S.A.W sebagai sumber rujukan Islam dimulai oleh Ali bin al-Mawafi ( 234 H ) iaitu guru kepada Imam *al-Bukhari*. Bermula daripada situlah lahirnya usaha-usaha untuk memisahkan hadith-hadith yang benar dan palsu yang terdapat dalam masyarakat. Ekoran itu maka lahirlah beberapa kitab Hadith yang masyhur

seperti al jami' as Sahih susunan Imam *al-Bukhari* ( 256 H ) dan al Jami' as-Sahih susunan Imam *Muslim* ( 261 H ) . Kedua-dua kitab tersebut dikenali dengan nama as-Sahahain (الصحيحين). Selepas kitab ini maka lahirlah pula empat buah kitab yang di namakan As-Sunnan *al-Arba'ah* (السنن الأربع) iaitu Sunan *Abi Daud* ( 275 H ), Sunan Al Tirmizi ( 271 H ), Sunan An-Nasa'i ( 303 H ) dan Sunan *Ibnu Majah* ( 277 H ). Kitab-kitab as-Sahahain dan Sunan *al-Arba'ah* ini juga dinamakan oleh ulamak sebagai al-Kutub *as-Sittah* (الكتب الستة).

Ternyata dalam perkembangan ilmu hadith Imam *al-Bukhari* dan Imam *Muslim* telah mendokong pengumpulan hadith-hadith sahih yang datang daripada Nabi Muhammad S.A.W.

## 1.2 PERNYATAAN MASALAH

Kitab-kitab sahih *al-Bukhari* dan *Muslim* telah memuatkan beratus-ratus kategori dari berbagai-bagai bab yang menyentuh persoalan iman hingga kepada akhlak. Penggumpulan kepelbagaian hadith-hadith ini telah banyak membantu umat Islam membuat rujukan dalam bidang-bidang yang berkenaan.

Walau bagaimanapun sehingga hari ini belum terdapat satu penulisan pun yang mengasingkan bidang-bidang yang terdapat dalam kitab-kitab sahih *al-Bukhari* dan *Muslim* sebagai sebuah buku.

Permasalahan iman dan aqidah merupakan topik yang sentiasa menjadi perbincangan dalam masyarakat. Walau bagaimanapun konsep mentakhrijkan hadith daripada riwayat Imam *al-Bukhari* dan *Muslim* dalam bab iman dan akidah masih belum dilakukan lagi di negara ini. Oleh itu Penyelidikan ini menjuruskan kepada 'mentakhrijkan' hadith-hadith dalam bab iman dan aqidah agar ianya akan mempermudahkan lagi kefahaman umat Islam dalam bidang ini.

## 1.3 OBJEKTIF PENYELIDIKAN

1. Menyusun hadith-hadith sahih riwayat Imam *al-Bukhari* dan Imam *Muslim* dalam bab iman dan aqidah.

2. Menyenaraikan tajuk-tajuk tertentu dalam bab iman dan aqidah bersama-sama dengan matan hadith.

## **1.4 SKOP DAN BATASAN PENYELIDIKAN**

Penyelidikan ini hanya ditumpukan terhadap hadith-hadith yang sahih sahaja yang diriwayatkan oleh Imam *al-Bukhari* dan *Muslim*. Bidang Penyelidikan hanya difokuskan terhadap persoalan iman dan aqidah sahaja.

### **Definisi Istilah**

Terdapat beberapa konsep dan istilah yang perlu diperjelaskan oleh penyelidik bagi menerangkan dengan lebih tepat kehendak dan keperluan perkara yang dibincangkan dalam Penyelidikan ini.

### **Takhrij**

“ Takhrij ” bermaksud menyusun ataupun menyaring. Dalam Penyelidikan ini pengkaji akan melakukan penyaringan terhadap hadith-hadith sahih sahaja dalam bab iman dan aqidah.

### **Hadith**

Dalam kitab *Manhatul al Mughis Fi ‘iImi Hadith* menyatakan bahawa hadith bermaksud perkataan, perbuatan dan pengakuan (taqrir) Rasulullah S.A.W. Sesetengah ulama menambah sifat-sifat Rasulullah S.A.W sendiri sebagai termasuk di dalam pengertian hadith.

### **Aqidah**

Mengikut Kamus Dewan aqidah bermaksud keyakinan dan kepercayaan sepenuh hati terhadap sesuatu perkara. Apabila dirujuk terhadap kaca mata Islam ianya menjuruskan kepada keyakinan terhadap Allah S.W.T sebagai Pencipta dan Pentadbir segala-galanya.

### **Keimanan**

Mengikut kamus dewan iman bermaksud kepercayaan akan adanya Allah dan mematuhi segala perintahNya. Keimanan pula membawa erti keyakinan dan ketetapan hati

terhadap sesuatu. Maka dalam pengertian ini ianya menjuruskan kepada keyakinan dan ketetapan hati terhadap Allah S.W.T.

## BAB DUA

### **HADITH SAHIH, HASAN, DHAIF**

#### **2.1 PENGENALAN**

Hadith jika dilihat dari satu sudut kesahihannya daripada Rasulullah S.A.W. dapat dibahagikan kepada dua jenis iaitu hadith yang *makbul* (diterima) dan *mardud* (tidak diterima).

1. Hadith yang *makbul* pula dibahagikan kepada dua iaitu:
  - i. *Sahih*
  - ii. *Hasan*
2. Hadith yang *mardud* ialah hadith *dhaif*.

##### **2.1.1 HADITH SAHIH:**

Hadith *sahih* ialah سندہ بالعدول الضابطین من غير شذ ولا علة (ما اتصل سنه بالعدول الضابطين من غير شذ ولا علة)

Hadith yang mempunyai *sanad* yang berhubung daripada seorang perawi kepada perawi yang lain sehingga akhir *sanad* melalui perawi-perawi yang *adil* dan *dhabit*. Hadith itu pula tidak *syaz* dan *'illah* (tidak cacat).

Apa yang dimaksudkan dengan *syaz* ialah suatu hadith yang diriwayatkan oleh seorang yang *thiqah* tetapi hadith ini bertentangan dengan hadith yang diriwayatkan oleh orang yang lebih *thiqah* atau bertentangan dengan hadith yang diriwayatkan oleh beberapa orang *thiqah*.

*'Illah* pula ialah kecacatan yang terdapat dalam sesuatu hadith yang menjadikan hadith itu tidak boleh diterima.

Apabila tidak terdapat salah satu daripada lima perkara ini, suatu hadith itu tidak boleh dihukum sebagai sahih.

### 2.1.2 HADITH HASAN

Para ulama telah banyak memberi ta'rif mengenai *hadith hasan*. Di antara ta'rif-ta'rif itu yang lebih mudah dan jelas ialah ta'rif yang diberikan oleh *al-Hafiz Ibn Hajar al-asqalabi*. Beliau menjelaskan hadith *Sahih li zatih* ialah hadith yang berhubung *sanadnya* dari perawi yang *adil* dan *dhabit* kepada perawi yang *adil* dan *dhabit*. Hadith itu juga tidak mempunyai '*illah*' dan tidak *syaz*. Seterusnya beliau menjelaskan jika perawi itu tidak juga mempunyai kekuatan ingatan (*khaf al-dhabit*) hadith yang diriwayatkan adalah *hasan*.

Daripada keterangan *al-Hafiz Ibn Hajar* di atas, dapat difahamkan bahawa *hadith hasan* ialah hadith yang mempunyai *sanad* yang berhubung daripada seorang perawi kepada perawi yang lain sehingga akhir *sanad*, melalui perawi-perawi yang *adil* dan mempunyai ingatan yang kurang sempurna, tidak *syaz* dan tidak mempunyai '*illah*'.

#### 2.1.2.1 CIRI-CIRI HADITH HASAN

*Hadith hasan* memerlukan lima perkara yang berikut:

1. Perawi setiap hadith itu mestalah berhubung diantara satu dengan yang lain.
2. Perawi itu mestalah *adil*.
3. Perawi itu tidak mempunyai kekuatan ingatan yang sempurna. Misalnya, *hadith sahih* memerlukan kekuatan menghafaz tidak kurang daripada 95%. Oleh yang demikian, hadith yang diriwayatkan oleh orang yang mempunyai kekuatan menghafaz hanya 85% sahaja adalah *hadith hasan*. Manakala hadith yang diriwayatkan oleh orang yang memiliki kekuatan menghafaz kurang daripada jumlah tersebut adalah lemah (*dhaif*).
4. Terhindar daripada *syaz*.
5. Tidak mempunyai '*illah*'.

### 2.1.3 HADITH DHAIF\*

*Hadith dhaif* ialah hadith yang tidak mempunyai ciri-ciri *hadith sahih* dan *hasan*. Kedhaifan sesuatu hadith sama ada disebabkan *sanadnya* tidak berhubung atau kerana sebab yang lain:

1. Tidak bersambung di antara seorang perawi dengan perawi yang lain.
2. Perawi tidak *adil*
3. Perawi tidak *dhabit*.
4. Mempunyai *syaz*.
5. Mempunyai ‘*illah*

## 2.2 PENGERTIAN HADITH SAHIH

Sahih menurut bahasa, lawan *saqiem* iaitu yang sihat, lawannya yang sakit dan bermakna *haq* iaitu lawan *batil*.

Definisi Ibn al-Shalah, Abu Amr Ibn al-Shalah mengatakan *hadith sahih* adalah *musnad* yang *sanadnya* bersambung melalui periwayatan orang yang *adil* lagi *dhabit* dari orang yang *adil* lagi *dhabit* (pula) sampai hujungnya, tidak *syaz* dan tidak *mu'all* (tidak ‘*illah*). Definisi menurut Imam Nawawi yang meringkaskan definisi Ibn al-Shalah:

هو ما اتصل سنه بالعدول الضابطين من غير شذوذ ولا علة

Ertinya:

“*Hadith sahih* adalah hadith yang bersambung *sanadnya* melalui (periwayatan) orang-orang yang *adil* lagi *dhabit* tanpa *syaz* dan ‘*illah*).

\* Bahagian Hadis Dhaif

Hadis-hadis dhaif mempunyai banyak bahagiannya iaitu:

1. Dhaif kerana tidak bersambung sanadnya. Ini termasuklah muallaq, munqati’, dan mursal.
2. Dhaif kerana terdapat perawi tidak adil. Ini termasuk munkar dan mudlis.
3. Dhaif kerana terdapat perawi tidak dhaif. Ini termasuk mudhtarab, maklub dan madruh.
4. Dhaif kerana syaz sama ada pada sanadnya atau pada matan atau kedua-duanya sekali.

Apa yang dimaksudkan dengan orang-orang yang *adil* lagi *dhabit* adalah dari perawi dalam *sanad* itu, iaitu yang diriwayatkan oleh perawi yang *adil* lagi *dhabit* dari perawi yang *adil* lagi *dhabit* (pula) dari awal sampai akhirnya. Definisi daripada Dr. M. ‘Ajaj al-Khatib pula memberi pengertian hadith yang *muttasil sanadnya* melalui periwayatan perawi *thiqah* dari perawi (lain) yang *thiqah* pula, sejak awal sampai akhir *sanad* tanpa *syaz* dan tanpa ‘*illah*.

Sahih menurut bahasa adalah dari kata *shahha*, *yashihhu*, *suhhan wa shahahan*, yang menurut bahasa bererti yang sihat, yang selamat, yang benar, yang sah dan yang sempurna. Para ulama biasa menyebut bahawa sahih ini sebagai lawan kepada kata dari *saqiem* (sakit). Maka kata hadith sahih menurut bahasa ialah hadith yang sah, hadith yang sihat atau hadith yang selamat.

Secara terminologi, *hadith sahih* didefinisikan oleh Ibn Shalah sebagai hadith yang disandarkan kepada Nabi yang *sanadnya* bersambung, diriwayatkan oleh perawi yang *adil* dan *dhabit*, diterima dari perawi yang *adil* dan *dhabit* hingga sampai akhir *sanad*, tidak ada kejanggalan dan tidak ber’*illah*. Ibn Hajar al-Asqalani mendefinisikan bahawa *hadith sahih* sebagai hadith yang diriwayatkan oleh seorang yang *adil*, sempurna *kedhabitannya*, bersambung *sanadnya*, tidak ber’*illah* dan tidak *syaz*.

Al-Qasimi juga mengemukakan definisi yang cukup ringkas yang hampir sama dengan yang dikemukakan al-Asqalani. Menurut beliau, *hadith sahih* ialah hadith yang bersambung *sanadnya*, diriwayatkan dan diterima daripada perawi yang *adil* lagi *dhabit* serta selamat atau terhindar dari kejanggalan dan ‘*illah*. Para ulama mendefinisikan *hadith sahih* sebagai hadith *musnad* yang mempunyai *sanad* yang bersambung dan diriwayatkan oleh perawi yang *adil* lagi *dhabit* daripada perawi yang *adil* lagi *dhabit* (dan begitulah seterusnya) hingga sampai kepada Rasulullah S.A.W., *sahabat* atau generasi selepas *sahabat* dan hadith berkenaan bukan hadith *syaz* atau hadith *mu'allal*. *Hadith sahih* juga ialah hadith yang diriwayat oleh periwayat-periwayat yang *adil* lagi *dhabit* (mempunyai ketepatan dan ingatan yang kuat). Sementara *sanadnya* hendaklah bersambung-sambung serta tidak cacat dan tidak *syaz* (janggal) yang bermula daripada awal hingga akhirnya. Al-Hafiz Ibn Hajar mengatakan bahawa *hadith sahih* ialah hadith yang diriwayatkan oleh orang-orang yang *adil*, kuat ingatannya, bersambung-sambung terus *sanadnya* kepada Nabi

S.A.W., tidak ada sesuatu yang cacat dan tidak bersalahan riwayat itu dengan riwayat orang yang lebih *rajih* daripadanya. Maksud hadith *sahih* yang lain ialah hadith diriwayatkan oleh perawi yang *adil* dan tidak mempunyai ingatan yang kuat serta *sanadnya* bersambung antara satu sama lain dan tidak mempunyai kejanggalan dan kecacatan.

## 2.3 PEMBAHAGIAN HADITH SAHIH

Hadith sahih terbahagi kepada dua iaitu sahih *li zatih* dan sahih *li ghairih*. Hadith sahih *li zatih* ertinya yang sah kerana zatnya, iaitu yang sah dengan tidak ada bantuan keterangan lain. Menurut istilah, iaitu satu hadith yang *sanadnya* bersambung dari permulaan sampai akhir, diceritakan oleh orang-orang yang *adil*, *dhabit* yang sempurna, serta tidak ada *syaz* dan tidak ada yang tercela.

### 2.3.1 SAHIH LI ZATIH

*Sahih li zatih* ialah hadith yang asalnya sahih dan kesahihannya itu sesuatu yang asal bukan disebabkan oleh sebab faktor yang lain. Misalnya

قال الامام البخارى، حدثنا الحميدى عبد الله بن الزبير قال حدثنا سفيان قال: حدثنا يحيى بن سعيد  
الأنصارى قال: أخبرنى محمد بن ابراهيم التيمى أنه سمع علقة بن وقاس الليثى يقول: سمعت عمر  
بن الخطاب رضى الله عنه على المنبر قال : سمعت رسول الله صلى الله عليه وسلم يقول : إنما  
الاعمال بالنيات الخ.....

Setelah dikaji bahawa *sanad* hadith tersebut, didapati perawi-perawinya adalah *thiqah* (*adil* dan *dhabit*) dan yang *thabit* pula pengambilan hadith daripada seorang perawi kepada gurunya iaitu bersambung antara setiap perawi. Hadith itu tidak mempunyai sebarang kecacatan yang boleh menjaskan kesahihannya. Dengan kata lainnya, hadith ini mencukupi syarat bagi *hadith sahih*.

Hadith sahih *li zatih* (sahih dengan sendirinya) juga hadith yang memiliki sifat-sifat *qabul* yang paling tinggi. Secara jelasnya hadith ini mempunyai kesinambungan pada *sanadnya*, pemindahan hadith tersebut dilakukan oleh seorang perawi yang *adil*, sabar dan sempurna dari awal hingga akhir, setiap perawi tidak ada yang tertinggal dan perawi itu mendengar

daripada gurunya dan hadith ini juga diakui kesahihannya oleh imam yang mentashihkan hadith.

### 2.3.2 SAHIH LI GHAIROH

*Sahih li ghairih* ialah yang asalnya tidak sahih tetapi disebabkan oleh faktor-faktor yang tertentu ia menjadi sahih. Pada asalnya, hadith ini ialah *hadith hasan*, tetapi disebabkan terdapat *tariq* lain yang yang meriwayatkan hadith ini, maka martabat hadith meningkat menjadi sahih. Oleh itu ia dinamakan hadith sahih *li ghairih*.

Misalnya,

قال الامام الترمذى : حدثنا أبو كريب حدثنا عبدة بن سليمان عن محمد بن عمرو عن أبي هريرة قال : قال رسول الله صلى الله عليه وسلم لو لا أن أشق على أمتي لأمرتهم بالسواك عند كل صلاة

Dalam *sanad* hadith ini, terdapat Muhammad bin Amru. Menurut ulama hadith meskipun beliau bersifat *adil*, namun ingatannya tidak cukup kuat (*dhabit*). Oleh itu hadith ini menurut *sanad* ini dihukumkan sebagai *hadith hasan*.

Walau bagaimanapun hadith ini diriwayatkan melalui beberapa *thariq*, iaitu terdapat *tariq* lain yang meriwayatkan daripada Abu Hurairah, juga *thariq* yang meriwayatkan daripada Rasulullah S.A.W. selain Abu Hurairah.

Hadith ini telah diriwayatkan oleh Imam *al-Bukhari* daripada Abdullah Bin Yusuf daripada Malik daripada Abu Zinab daripada al-A'raj daripada Abu Hurairah daripada Rasulullah S.A.W..

Oleh itu hadith yang diriwayatkan melalui Muhammad Bin Amru yang pada asalnya *hadith hasan*, menjadi *hadith sahih* disebabkan beberapa *thariq* lain yang sahih. Oleh yang demikian ia dinamakan *sahih li ghairih*.

*Hadith hasan* akan menjadi *sahih li ghairih* hanyalah apabila terdapat *thariq* lain yang lebih kuat iaitu sahih, atau yang seumpamanya iaitu *hasan* sepertinya, sekiranya terdapat *thariq* lain yang lemah, maka *hadith hasan* itu tidak boleh menjadi *hadith sahih li ghairih*.

Hadith sahih *li ghairih* ( sahih kerana yang lain ) pula ialah hadith yang dikira sahih berdasarkan kepada perkara luar dan hadith berkenaan tidak mempunyai sifat-sifat *qabul* yang paling tinggi. Contohnya, sekiranya *hadith hasan* diriwayatkan daripada pelbagai *turuq* (saluran) yang dapat menyokong antara satu sama lain sehingga boleh meningkatkan darjat *hasan* kepada *sahih*. Ia juga sama dengan hadith *hasan li zatih* iaitu yang memenuhi syarat-syarat *hadith sahih* seluruhnya kecuali para periyatnya semua sekali atau sebahagian daripada mereka kurang *dhabit* (daya ingatan dan hafalan), tetapi dengan kejujuran periyatnya dan mendapat sokongan satu riwayat lain yang serupa atau lebih kuat. *Sanadnya* juga mempunyai kesinambungan.

## **2.4 SYARAT-SYARAT PENERIMAAN HADITH-HADITH SAHIH**

### **2.4.1 PERAWINYA BERSIFAT ADIL**

Keadilan di sini ialah orang yang selalu memelihara perbuatan, taat dan menjauhi perbuatan maksiat. Mereka juga menjauhi dosa-dosa kecil yang dapat merosakkan agama dan sopan-santun mereka. Mereka juga tidak melakukan perkara-perkara mubah yang dapat menggugurkan iman kepada qadar dan mengakibatkan penyesalan, dan tidak pula mengikut pendapat salah satu mazhab yang bertentangan dengan dasar syara’.

Seseorang periyat yang bersifat *adil* ialah seorang yang beragama Islam, akil baligh, tidak pernah melakukan dosa-dosa besar, sentiasa taat kepada Allah, menjauhi maksiat dan dosa-dosa kecil yang menodai kesucian agama, tidak melakukan perkara-perkara yang menjelaskan keimanan, tidak melakukan perkara-perkara yang menjatuhkan kehormatan agama dan tidak mengikut pendapat mazhab yang berlawanan dasar syarak.

### **2.4.2 PERAWINYA MEMPUNYAI INGATAN YANG SEMPURNA**

Ingatan yang sempurna ialah orang yang kuat ingatannya. Untuk mengambil sesuatu hadith, para *muhaddithin* mensyaratkan dalam mengambil suatu hadith, hendaklah diambil dari hadith yang diriwayatkan oleh perawi yang bersifat *adil* lagi *dhabit*.

Maksudnya ialah seorang periwayat itu dapat menyampaikan hadith yang diterima daripada syeikhnya dengan tepat dan sempurna, tanpa terlebih atau terkurang, daya ingatannya lebih kuat daripada sifat lupanya dan kebenarannya lebih banyak daripada kesalahannya. Kedhabitannya seseorang periwayat itu dapat diketahui dengan pengisytiharan dan pengakuan ahli-ahli hadith yang *thiqah*.

Keadilan seseorang periwayat itu dapat diketahui melalui pengisytiharan dan pengakuan orang ramai seperti pengakuan orang ramai terhadap keahlian imam-imam yang empat. *Dhabit* berlaku sama ada *dhabit* kitab (penjagaan buku) iaitu jika sesuatu hadith itu diterima secara catitan atau tulisan buku (kitab) periwayat itu dikehendaki memelihara dengan sempurna bermula daripada hadith itu diterima oleh gurunya (syeikh) hingga disampaikan kepada periwayat yang lain (murid-muridnya). *Dhabit* yang satu lagi ialah *dhabit* ingatan atau hafalan iaitu periwayat itu betul-betul hafal hadith yang diterima daripada gurunya sehingga hadith itu disampaikan kepada periwayat yang lain.

Kesimpulannya maksud *dhabit* itu ialah periwayat itu tidak pelupa, betul-betul ingat, mempunyai ketepatan dan penguasaan secara penuh akan hadith yang diterimanya disampaikan kepada periwayat lain.

#### 2.4.3 SANAD HADITH BERSAMBUNG DAN SENTIASA BERTURUTAN

Yang dimaksudkan dengan sanad bersambung-sambung ialah sanad yang selamat dari keguguran. Dengan kata lain, bahawa tiap-tiap perawi dapat saling bertemu dan menerima secara langsung dari guru yang memberi.

Keadaan bersambung sanad ini berlaku dari awal sanad, tabaqat pertama (*sahabat*) hingga kepada periwayat terakhir yang menuliskan hadith tersebut tanpa tertinggal walaupun seorang periwayat (tanpa terputus). Dari keterangan di atas *hadith mursal* iaitu hadith yang gugur sanad daripada golongan *sahabat*, dan menurut pendapat yang paling rajih, *hadith mursal* dikategorikan dalam *hadith dha'if*, bukan *hadith sahih*.

#### 2.4.4 TERHINDAR DARIPADA SYAZ (TIDAK JANGGAL)

Kejanggalan sesuatu hadith bergantung kepada pertentangan antara sesuatu hadith yang perawi yang diriwayatkan oleh perawi yang *makbul* dengan hadith yang diriwayatkan oleh perawi yang lebih kuat disebabkan perawinya lebih ramai.

Maksudnya ialah sesuatu hadith yang diriwayatkan oleh seorang periwakat yang *thiqah* berada dalam keadaan *syaz* (janggal) berbanding dengan hadith yang diriwayatkan oleh periwakat-periwakat lain yang lebih *thiqah* (yang lebih dipercayai benar perkhabarannya) daripadanya, sama ada *syaz* itu berlaku pada sanad atau matan hadith.

#### 2.4.5 TIDAK BER'ILLAH

*'Illah* ialah suatu keadaan (berupa kecacatan) yang menghalang sesuatu hadith untuk diakui sebagai *hadith sahih*. Umpamanya hadith yang diriwayatkan secara bersambung tetapi tertinggal seorang atau lebih periwakat. Ataupun dalam sanadnya terdapat seorang yang fasiq atau tidak sempurna ingatannya (tidak *dhabit*) dan sebagainya. Contohnya meriwayatkan hadith secara muttasil terhadap *hadith mursal* atau terhadap *munqati'* dan sebaliknya.

Jika sesuatu hadith itu memenuhi kelima-lima syarat tersebut, ia boleh dikategorikan pada darjah dan tahap sahih yang boleh dijadikan hujah dan sandaran hukum.

### 2.5 TARAF HADITH SAHIH

Taraf hadith sahih adalah berbeza. Para *muhaddithin* telah memperkenalkan hadith daripada hadith yang lebih *sahih*. Mereka percaya bahawa *hadith sahih* berbeza antara satu sama lain berdasarkan kepada kekuatan sifat-sifat yang membolehkan hadith itu dihukum *sahih*. Berhubung dengan perbezaan taraf ini, Imam *al-Nawawi* tidak meluaskan perbincangan. Sebaliknya beliau hanya membahagikan *hadith-hadith sahih* itu kepada 7 bahagian, mengikut turutan antaranya:

- i. Taraf kesahihan yang paling tinggi ialah hadith-hadith yang diriwayatkan yang disepakati antara *al-Bukhari* dan *Muslim*.
- ii. Diikuti oleh hadith yang hanya diriwayatkan oleh *al-Bukhari* sahaja..
- iii. Hadith yang diriwayatkan oleh *Muslim* sahaja.
- iv. Hadith yang memenuhi syarat yang dikenakan oleh *al-Bukhari* dan *Muslim* walaupun hadith berkenaan tidak diriwayatkan oleh mereka.
- v. Hadith-hadith yang memenuhi syarat yang dikenakan oleh *al-Bukhari* sahaja.
- vi. Hadith yang memenuhi syarat yang dikenakan oleh *Muslim* sahaja.
- vii. Hadith yang dihukum *sahih* oleh imam lain (ulama).

Perbezaan *hadith sahibh* ini juga dilihat berdasarkan kepada negeri-negeri kelahiran, terutama ( difokuskan kepada bandar ) perawi itu sendiri. Sebilangan besar ulama memutuskan bahawa hadith yang paling sahibh ialah hadith yang diriwayatkan oleh penduduk *Madinah* yang digelar sebagai negeri *al-Sunnah al-Musyarrifah*.

Ibn Taimiyyah menegaskan dengan katanya, “Para ahli hadith bersetuju mengatakan bahawa hadith yang paling sahibh ialah hadith yang diriwayatkan oleh penduduk *Basrah*, dan diikuti penduduk *Syam*.” Al-Khatib al-Baghdadi ada menegaskan dengan katanya bermaksud, “Turuq hadith yang paling sahibh ialah yang diriwayatkan oleh penduduk dua tanah haram *Makkah* dan *Madinah*. Ini kerana sedikit sahaja berlaku tадlis di kalangan mereka.”

Para ulama hadith berselisih pendapat berhubung dengan sanad yang paling sahibh. Berdasarkan ini maka kita tidak boleh memutuskan bahawa sanad yang paling sahibh adalah dikhususkan kepada seorang *sahabat* sahaja.

## 2.6 TOKOH-TOKOH HADITH

Pada kurun ketiga Hijrah, lahirlah ramai penghimpun dan pengumpul hadith. Walau bagaimanapun yang lebih terkenal di antaranya ialah:

- i. Imam *al-Bukhari* ( 194 H – 256 H )
- ii. Imam *Muslim* ( 206 H – 261 H )
- iii. Imam *Abu Daud* ( 202 H – 275 H )

- iv. Imam *Tirmizi* (209 H – 279 H )
- v. Imam *Nasa'i* ( 215 H – 303 H )
- vi. Imam *Ibn Majjah* ( 209 H – 273 H )

## 2.7 KITAB-KITAB *HADITH SAHIH*

Antara kitab-kitab yang dikumpulkan untuk *hadith sahih* ialah:

- i. *Sahih al-Bukhari* ( صحيح البخارى )
- ii. *Sahih Muslim* ( صحيح مسلم )
- iii. *Sahih Ibn Huzaimah* ( صحيح ابن حزيمه )
- iv. *Sahih ibn Hibban* ( صحيح ابن حبان )
- v. *Al-sunan as- Sahahu li Sa'di Ibn as- Sukan* ( السنن الصحاح لسعد بن السكن )

### 2.7.1 RASIONAL MENGETAHUI LATAR BELAKANG PERAWI

Sesungguhnya setiap sesuatu itu mempunyai sejarah tersendiri, sama ada baik mahupun sebaliknya, demikian juga dengan sejarah hidup periwayat. Mengetahui tentang sejarah hidup serta latar belakang setiap periwayat hadith adalah amat penting kerana untuk kita menerima atau menggunakan hadith tersebut sebagai hujah, maka ianya perlu nyata akan kesahihan hadith tersebut. Martabat seseorang perawi itu dinilai oleh para ulama terlebih dahulu sebelum hadith diterima. Jadi, kita telah ketahui bahawa penerimaan sesuatu hadith itu bukanlah boleh dibuat secara main-main tetapi ianya dibuat secara teliti dan berhati-hati.

Bagi periwayat hadith, orang tersebut mestilah mematuhi syarat-syarat yang berikut iaitu, seseorang itu hendaklah mempunyai ilmu yang mendalam di dalam ilmu agama, serta memahami dengan baik al-Qur'an, as-Sunnah dan pengambilan hukum yang berkaitan daripada kedua-dua sumber tersebut. Seseorang itu juga hendaklah seorang yang bertaqwa, wara' dan tidak dicaci serta dicela atau bukan *majruh* ( محرر )

Sesorang itu juga hendaklah sentiasa menjaga agama dan tidak ta'asub kepada mana-mana perawi serta mengetahui sebab yang membawa kepada taraf adil dan tercela atau sebab yang membawa kepada *al-Jarh wa al-Ta'dil*.

## 2.7.2 IMAM AL-BUKHARI

### 2.7.2.1 RIWAYAT HIDUP IMAM AL-BUKHARI

Nama penuh beliau ialah Muhammad Bin Ismail Bin Ibrahim Bin al-Mughirah Bin Bardizbah al-Ja'fa *al-Bukhari*. Perkataan *al-Bukhari* diambil daripada perkataan *Bukhara* iaitu nama suatu tempat di wilayah Uzbekistan. Beberapa orang ulama di dalam pelbagai bidang ilmu lahir dari daerah ini. Pada zaman itu tempat ini dianggap sebagai tempat yang bersejarah. Maka perkataan *al-Bukhari* ialah nisbah kepada *Bukhara*.

Imam *al-Bukhari* telah dilahirkan di *Bukhara* pada bulan Syawal tahun 194 H. Beliau meninggal dunia pada bulan Syawal tahun 256 H, iaitu setelah berusia 62 tahun. Beliau dilahirkan dari kalangan keluarga yang bertaqwa dan alim. Kedua-dua ibu bapanya adalah dari kalangan orang-orang yang soleh dan sentiasa menghampirkan diri kepada Allah. Bapanya meninggal dunia sewaktu beliau masih kecil lagi dan beliau diasuh oleh ibunya. Bapanya alim dalam bidang hadith. Beliau mempelajari hadith dari ulama-ulama yang agung pada masa itu seperti Hamad Bin Zaid dan Malik Bin Anas. Seorang tokoh hadith yang terkemuka pada masa itu, Abdullah Bin al-Mubarak menjadi sahabat karib beliau.

Ibn Hibban ( Muhammad Bin Hibban ) iaitu salah seorang ulama hadith yang terkenal telah mencatatkan nama bapa Imam *al-Bukhari* di dalam kitabnya *al-Thiqat*, “Bahawa Ismail ( bapa Imam *al-Bukhari* ) adalah seorang yang dikenali sebagai seorang yang soleh dan warak. Sewaktu hampir ajalnya beliau ada menerangkan kepada seorang kawannya yang bernama Uhaid Bin Hafs bahawa tidak terdapat di dalam hartanya milik yang haram dan yang syubhah walau satu dirham sekalipun.

Ibu Imam *al-Bukhari* juga seorang yang solehah, sentiasa menghampirkan diri kepada Allah. Imam *al-Bukhari* pada masa kecilnya terkena penyakit mata dan beliau tidak

dapat melihat. Kemudian pada suatu ketika ibunya telah bermimpi bertemu dengan Nabi Ibrahim a.s. baginda menerangkan kepadanya bahawa penyakit anaknya itu akan sembah disebabkan doa yang banyak daripada ibu yang solehah.

### 2.7.2.2 LATAR BELAKANG PENDIDIKAN IMAM AL-BUKHARI

Imam *al-Bukhari* pada masa kecilnya adalah seorang kanak-kanak yang cerdik. Beliau belajar sejak berumur sepuluh tahun atau kurang sedikit daripada itu. Tempat beliau belajar ialah di *dar al-Kitab*. Ketika itu beliau mula menghafaz banyak hadith Rasulullah S.A.W..

Keinginan yang mendalam untuk mendalami pengajian dalam bidang hadith semakin meningkat. Ini menjadikan beliau selalu berulang-alik menemui guru-guru hadith yang terdapat di tempatnya seperti Muhammad Salam al-Bikundy, Abdullah Bin Muhammad al-Musandy, Harun Bin al-Ash'as dan Muhammad Yusuf al-Bikundy.

Pada masa beliau berumur sebelas tahun beliau telah dapat membetulkan kesilapan seorang guru yang bernama *al-Dakhily*. *Al-Dakhily* menerangkan kepada penuntutnya “Sufian mengambil hadith daripada Abi al-Zubair dan Abi al-Zubair mengambil dari Ibrahim”, kata Imam *al-Bukhari*, “Abu Zubair tidak meriwayatkan daripada Ibrahim.” Guru itu mengherdiknya dan *al-Bukhari* menjawab, “Silalah tuan guru rujuk kepada yang asal jika yang asal itu ada pada tuan.” Setelah guru itu merujuk kepada yang asal dan didapati apa yang dikatakan oleh *al-Bukhari* itu betul lalu ia berkata kepada *al-Bukhari*, “Siapakah yang sebenarnya yang meriwayatkan hadith itu, wahai kanak-kanak?” Jawab *al-Bukhari*, “Yang sebenarnya ialah al-Zubair iaitu al-Zubair Bin Adi yang mengambil hadith daripada Ibrahim.” Kemudian tuan guru pun mengambil kalamnya dan membetulkan kesilapannya.

Setelah Imam *al-Bukhari* berusia enam belas tahun beliau telah dapat menghafaz kitab-kitab yang ditulis oleh Ibn al-Mubarak dan Waki'. Kedua-duanya adalah yang termasyhur. Dalam usia yang sama juga beliau bersama-sama ibu dan saudara lelakinya yang tua yang bernama Ahmad telah pergi ke *Makkah* kerana menunaikan haji. Ibu dan saudaranya balik ke *Bukhara* setelah selesai mengerjakan haji, tetapi Imam *al-Bukhari* terus menetap di *Makkah* untuk melanjutkan pelajarannya dalam bidang hadith. Di *Makkah*

beliau telah dapat belajar dengan ulama-ulama hadith yang masyhur seperti Abu al-Walid Ahmad Bin Muhammad al-Azraqi dan Ismail Bin Salim al-Sayigh. Kemudian Imam *al-Bukhari* berziarah ke *Madinah al-Munawwarah* untuk bertemu dengan ulama-ulama hadith di sana di samping menziarahi makam Rasulullah. Di tempat yang mulia ini, Imam *al-Bukhari* telah mula menunjukkan bakatnya dalam bidang penulisan yang mana beliau telah menulis kitab yang memperkatakan tentang perawi-perawi hadith, sama ada *thiqah* atau *dhaif* yang dinamakan *tarikh al-Takbir*. Untuk lebih jelas berhubung dengan perkara ini perhatikan kata Imam *al-Bukhari* sebagaimana yang dicatatkan oleh Ibn Hibr

فِي ثَمَانِي عَشَرْ صَنْفَتْ كِتَابٍ قَضَا يَا الصَّحَابَةَ وَالْتَّابِعِينَ ثُمَّ صَنَفَتْ التَّارِيخَ فِي الْمَدِينَةِ عِنْدَ قَبْرِ النَّبِيِّ  
صَلَّى اللَّهُ عَلَيْهِ وَسَلَّمَ وَكَنْتُ أَكْتُبَهُ فِي اللَّيَالِي الْمُقْمَرِ

maksudnya “Setelah aku berusia lapan belas tahun aku menulis kitab berhubung dengan *qadhiah-qadhiah* sahabat dan tabi’in kemudian aku mengarang kitab *tarikh*, di *Madinah al-Munawwarah* di sebelah makam Rasulullah S.A.W.. Aku menulis kitab ini pada malam sewaktu bulan sedang menyinari alam.

Setelah menetap di *Madinah al-Munawwarah* pada beberapa ketika Imam *al-Bukhari* terus menyambung dan meluaskan ilmu pengetahuannya mengenai hadith ke negeri-negeri lain termasuklah *Hams, Damsyik, Mesir, Naisabur, Baghdad, Basrah, Kuffah, dan Wasit*.

Menyentuh tentang guru-guru Imam *al-Bukhari*, sesungguhnya beliau mempelajari hadith daripada guru-guru yang unggul dalam bidang ini. Beliau mengambil hadith daripada 1,080 orang ulama. Guru-guru Imam *al-Bukhari* itu adalah terdiri daripada ulama-ulama yang *thiqah* (*adil* dan *dhabit*) sahaja, beliau tidak mengambil hadith daripada mereka yang tidak *thiqah* sekalipun banyak mempunyai ilmu.

### 2.7.2.3

### GURU-GURU IMAM AL-BUKHARI

Di *Bukhara* iaitu tempat tumpah darahnya sendiri beliau telah belajar daripada Muhammad Bin Salam al-Bikundy, Muhammad Bin Yusuf, Harun bin al-Ash’as dan yang lain-lain.

Di *Balakh*, Muky Ibn Ibrahim, Yahya Bin Basyr, Qutibah Bin Sa ‘id dan lain-lainnya.

Di *Marwa*, Ali Bin al-Hasan, Abdan Bin Abdullah, Muhammad Bin Muqatil dan lain-lainnya.

Di *al-Ray*, Ibrahim Bin Musa al-hafiz dan lain-lainnya.

Di *Baghdad*, Sarih, Affan, Muhammad Bin Isa al-Toba' dan lainnya.

Di *Basrah*, Abi 'Asim al-Nabil, Badl Bin al-Mahrab, Muhammad Bin Abdullah al-Ansari dan lain-lainnya.

Di *Kuffah*, Abu Na 'im, Thallaq Bin Ghanam, al-Hasan Bin al-Rabi', Khilada Bin Yahya, Qabisah dan lain-lainnya.

Di *Makkah*, Al-Hamidy dan dari al-Hamidy *al-Bukhari* mempelajari fikh al-Syafi'i, di *Makkah* juga beliau telah belajar daripada Abu al-Walid Ahmad Bin Muhammad Bin al-Azraqy, Abdullah Bin Yazid al-Marqy, Ismail Bin Salim al-Soi' dan lain-lainnya.

Di *Wasit*, Hasan Bin Abdullah, Sa'id Bin Abdullah dan lain-lainnya.

Di *Mesir*, Ahmad Bin Salih, Uthman Bin Salih, Ahmad Bin Syabib dan lain-lain.

Di *Naisabur*, Yahya Bin Yahya al-Tamimy, Basyr Bin al-Hakam, Ishaq Bin Rahuyah, Muhammad Bin Yahya al-Zahly dan lain-lain.

Di *Madinah al-Munawwarah*, Abd al-'Aziz al-Ausi, Matraf Bin Abdullah, Ibrahim Bin al-Mazur al-Huzaimy, Yahya Bin Qi'ah dan lain-lain.

#### 2.7.2.4

#### KEISTIMEWAAN IMAM AL-BUKHARI

Imam *al-Bukhari* terkenal sebagai seorang ahli hadith yang mahir dan dapat memahami hadith-hadith Rasulullah dengan mendalam sekali. Beliau juga dapat membezakan di antara hadith yang cacat "ma'al" dan hadith yang sahih, mengenali perawi-perawi secara terperinci dengan mengenali sifat-sifat mereka sama ada *thiqah* atau tidak. Beliau dapat memahami serta hafaz hadith-hadith Rasulullah beserta dengan *sanadnya* sekali sehingga beliau digelar *amirul mu'minin fi al-hadith*.

Ketinggian ilmu Imam *al-Bukhari* dalam bidang hadith tersebar luas. Beliau mempunyai akal yang bijaksana, ketekunan dan ketabahan, serta galakan daripada ibunya selain menjadi pewaris bapanya dalam mengembangkan ilmu hadith.

Al-Subky telah menceritakan daripada seorang yang mengenali al-Imam *al-Bukhari* secara hampir iaitu seorang teman belajarnya Hasyd dan seorang teman lain. Kata mereka,

“Kami bertanya *al-Bukhari*, mengapa kamu telah begitu lama tidak menulis hadith? “ Imam *al-Bukhari* menjawab, “Cuba kamu ambil hadith yang telah kamu tulis.” Setelah kami ambil hadith itu yang berjumlah lebih daripada lima belas ribu, maka *al-Bukhari* pun membacakan hadith itu semua dan kami memperbetulkan hadith yang kami tulis itu melalui hafaznya. Kemudian katanya kepada kami “ Adakah saya sia-siakan masa selama ini?” Dengan itu kami mengakui bahawa *al-Bukhari* mempunyai kelebihan yang begitu istimewa.

Satu ujian besar telah dikenakan oleh para ulama *Baghdad* kepada beliau di mana sebagai ujian untuk menguji kekuatan ingatannya. Apabila sampai di sana beliau telah bertemu dengan mereka dan mereka meminta supaya beliau mengadakan pertemuan ilmiah. Setelah dipersetujui mereka pun memanggil ahli-ahli hadith yang terkenal supaya hadir ke majlis tersebut. Sebelum sampai masa yang ditetapkan, para ulama telah memilih seratus hadith yang dicampur-adukkan di antara *matan* satu hadith dengan *sanad* hadith yang lain, kemudian seratus hadith itu dibahagikan kepada sepuluh orang ahli hadith. Setelah sampai masa yang ditentukan maka sepuluh orang yang telah ditetapkan tadi pun bertanya kepada *al-Bukhari* secara bergilir-gilir, setiap seorang sepuluh soalan, kemudian setelah habis sepuluh soalan yang pertama, berpindah kepada orang yang kedua dan begitulah seterusnya sehingga selesai. Imam *Al-Bukhari* hanya menjawab “ (أَدْرِى) (Aku tidak tahu).

Setelah selesai semua soalan dikemukakan, *al-Bukhari* mengulang semula semua soalan-soalan itu sebagaimana yang mereka lafazkan, kemudian *matan* hadith beserta *sanadnya* yang asal dikembalikan dengan betul. Menurut Ibn Hajar perkara yang menghairankan ialah bagaimana beliau menghafaz semua *matan* dan *sanadnya* yang dicampur-adukkan itu satu persatu sehingga akhir, kebolehan beliau menghafaz segala *sanadnya* dan *matannya* yang betul ini memang sewajarnya diperakui kerana beliau seorang *hafiz*. Para ulama yang hadir begitu mengagumi kehebatan kekuatan ingatan dan ketinggian ilmunya dan mereka mengiktiraf kelebihan *al-Bukhari*.

Sebanyak empat ratus orang ahli hadith di *Samarkand* telah bersatu untuk mencari kelemahan *al-Bukhari* namun hasilnya tetap gagal. Sehubungan itu pengaruh *al-Bukhari* semakin tersebar luas sehingga setiap tempat yang beliau berada, ramai para ulama sama

ada dari ahli hadith atau pun yang lainnya, meminta supaya beliau memberikan kuliyah mengenai hadith. Di *Basrah* umpamanya beliau telah dijemput untuk mengadakan majlis ilmiah yang dihadiri beribu-ribu orang termasuk *muhadithun*, *hafiz*, *fuqaha'* dan *ahli fikr*. Kemudian beliau merencanakan hadith kepada mereka. Apa yang sangat menarik perhatian mereka ialah hadith yang direncanakan oleh Imam *al-Bukhari* ialah dari hadith ahli *Basrah* tetapi belum pun mereka ketahui dan beliau menerangkan *sanad* hadith yang mereka ketahui ialah begini-begini. Sedangkan *sanad* dari si polan ini belum lagi diketahui oleh mereka.

Imam *al-Bukhari* juga telah menghafaz lebih kurang 100,000 *hadith saih* dan 200,000 hadith yang tidak *sahih*. Beliau menghafaz *hadith saih* untuk dijadikan hujah manakala hadith yang tidak *sahih* dihafaz untuk menolak dijadikan hujah.

#### 2.7.2.5 PANDANGAN ULAMA TERHADAP IMAM AL-BUKHARI

Sebagai seorang yang telah diberi gelaran *amirul mu'min fi al-hadith* sudah tentu banyak sanjungan para ulama terhadapnya. Di sini diperhatikan beberapa pandangan ulama terhadap beliau:

1. Menurut Imam *Ibn Huzaimah* yang dinukil oleh al-Subky “aku tidak pernah melihat di bawah langit yang terbentang luas ini seorang manusia yang lebih alim dalam bidang hadith selain Muhammad Bin Ismail (*al-Bukhari*).”
2. Menurut Imam *Ahmad Bin Hanbal* yang dinukilkhan oleh al-Subky “terdapat empat orang huffaz dari *Khursan* iaitu Abu Zar'ah, Muhammad Bin Ismail (*al-Bukhari*), al-Daramy dan al-Hasan Bin Shuja' al-Bahly.”
3. Menurut Muhammad Bin Salam sebagaimana yang dinukilkhan oleh al-Subky “Apabila terdapat budak ini (*al-Bukhari*) di dalam majlisku, aku merasa gelisah dan sentiasa rasa takut sehingga ia keluar.”
4. Menurut Ya'kub Bin Ibrahim al-Dawarqy “*Al-Bukhari* adalah fakih umat Muhammad.”
5. Imam Muslim telah berjumpa *al-Bukhari* lantas mencium dahinya di antara matanya dan katanya “Izinkan aku mencium kedua kakimu wahai guru bagi segala

guru, ketua kepada segala ahli hadith dan yang dapat mengetahui segala kecacatan hadith.”

6. Menurut Salim Bin Mujahid yang dinukilkkan oleh al-Subky “Aku belum pernah melihat sejak enam puluh tahun, orang yang lebih alim, wara’, dan lebih zuhud daripada Muhammad Bin Ismail.”
7. Menurut Abdullah Bin Abdul Rahman al-Daramy yang dinukilkkan oleh Hibr “Aku telah banyak melihat ulama di *Makkah*, *Kuffah*, *Basrah*, tetapi belum pernah melihat orang yang lebih alim daripada Muhammad Bin Ismail.”
8. Menurut Imam al-Tirmizi yang dinukilkkan oleh Ibn Hibr “Allah telah menjadikan engkau sebagai perhiasan kepada umat Muhammad ini.” Katanya lagi, “Aku belum pernah melihat orang yang lebih memahami tentang *ilal* (عل) dan *rijal* (رجال) selain Muhammad Bin Ismail.”
9. Menurut seorang tokoh hadith yang bernama Muhammad Bin Basyar yang dinukilkkan oleh Ibn Hibr “*Al-Bukhari* adalah orang yang paling fakih pada zaman kami.”
10. Menurut al-Musnady yang telah dinukilkkan oleh Ibn Hibr “Muhammad Bin Ismail adalah seorang imam dan sesiapa yang tidak mengatakan dia bukan imam maka hendaklah engkau meragui orang itu.”

#### 2.7.2.6 HASIL KARYA IMAM AL-BUKHARI

*Al-Bukhari* telah memberi sumbangan yang besar kepada umat Islam. Dengan karyanya yang begitu banyak dan sangat bernilai. Di antara karyanya yang paling masyhur di kalangan umat Islam dan mendapat penilaian yang begitu tinggi ialah sahih *Al-Bukhari*. Malah karyanya yang lain ialah:

1. *Raf'u al-Yadin fi al-Solat*
2. *Qiraat khalf al-Imam*
3. *Al-Tarikh al-Wast*
4. *Kitab al-Syurbah*
5. *Asamy al-Sahabat*
6. *Biral wa al-Din*
7. *Al-Tafsir al-Kabir*

8. *Khalq af 'al al-Ibad*
9. *Kitab al-Alal*
10. *Qadha ya al-Sahabat wa al-Tabi 'in*
11. *Kitab al-Musnad al-kabir*
12. *Kitab al-Wahdan*
13. *Kitab al-Mabsut*
14. *Kitab al-Hibbah*
15. *Kitab al-Kany*
16. *Kitab al-Fawaid*
17. *Al-Adabul mufrad*
18. *Al-Tarikh al-Saghir*
19. *Al-Tarikh al-Kabir*
20. *Kitab al-Dhua 'fa'*

#### 2.7.2.7 SAHIH AL-BUKHARI.

Sahih *Al-Bukhari*, sebagaimana yang dikatakan oleh para ulama adalah merupakan kitab yang paling tinggi dari segi kesahihannya. Dengan lain perkataannya tidak terdapat sebuah kitab yang lebih sahih daripada sahih *al-Bukhari* selepas al-Qur'an.

Kitab ini disusun oleh imam *al-Bukhari* setelah beliau benar-benar mahir dan pakar dalam bidang hadith. Kitab ini disusun setelah beliau menjelajah ke merata negeri untuk menambah kemahiran beliau dalam bidang hadith. Penyusunan kitab ini mengambil masa yang begitu lama sekali. Tersusunnya kitab ini yang hanya mengandungi hadith-hadith *sahih* serta dengan penelitian yang begitu tinggi dan rapi yang hanya dapat dilakukan oleh orang yang benar-benar alim sahaja, memang selayaknya Imam *al-Bukhari* digelar sebagai *amirul mukminin fi al-hadith*.

Sahih *al-Bukhari* adalah karya Imam *al-Bukhari* yang paling dihargai dan merupakan sumbangan yang amat besar kepada umat Islam. Kitab ini telah pun tersebar ke seluruh dunia. Umat Islam, khususnya para ulama bertanggungjawab untuk memahami dan menganalisa hadith-hadith yang terdapat di dalamnya untuk dijadikan panduan hidup, demi meninggikan kedudukan umat Islam dan kebahagian mereka di dunia dan akhirat.

### 2.7.2.8

### JUMLAH HADITH SAHIH AL-BUKHARI

Hadith sahih *al-Bukhari* mengandungi sebanyak 9,082 hadith termasuk yang terulang. Jumlah ini tidak termasuk hadith yang *mauquf* kepada *sahabat*, dan hadith *maqtu'* kepada *tabi'in* dan selepas mereka. Hadith *al-Bukhari* yang *mausul* dan tidak berulang berjumlah 2,602. hadith yang *muallaq* (معلق) dan *marfu'* (مرفوع) berjumlah 159 hadith.

### 2.7.2.9

### TEMPOH PENULISAN SAHIH AL-BUKHARI

Imam *al-Bukhari* mengambil masa yang begitu lama iaitu selama enam belas tahun untuk menulis sahihnya. Hadith-hadith yang dikumpulkan itu diambil daripada sebanyak 600,000 hadith yang didapatinya.

Perkara yang paling menarik ialah setiap hadith yang dimasukkan ke dalam sahihnya itu ialah hadith yang benar-benar telah diyakini sahnya, dan sebelum beliau memasukkan hadith itu ke dalam sahihnya, beliau beristikhharah terlebih dahulu kepada Allah dengan sembayang dua rakaat.

Dari pengakuan Imam *al-Bukhari* di atas jelas menunjukkan bahawa hadith yang terdapat di dalam *sahih al-Bukhari* adalah *hadith-hadith sahih* sahaja. Para ulama telah membuat kajian yang mendalam terhadap *sahih al-Bukhari* dan mereka mengakui pengesahan dan *hadith sahih al-Bukhari* itu.

Pengumpulan *sahih al-Bukhari* dimulakan di *Makkah* kemudian usaha itu diteruskan semasa beliau di *Madinah* dan di *Basrah* sehingga beliau balik ke tempat asalnya, *Bukhara*.

### 2.7.2.10 CARA PENULISAN

Hadith-hadith yang terdapat dalam *sahih al-Bukhari* ialah *hadith sahih*. Pengesahan suatu hadith dinilai dari dua aspek:

- i. *Sanad*
- ii. *Matan*

*Sanad* ialah jalan untuk sampai kepada *matan* hadith, dan *matan* pula ialah nas yang disampaikan sama ada nas itu perkataan, perbuatan, ikrar atau lainnya.

Dari segi *sanad* disyaratkan *hadith sahih* mestilah:

- i. *Muttasil al-sanad* segala perawinya berhubung.
  - ii. Perawi-perawinya itu mestilah *adil*.
  - iii. Perawinya itu mestilah *dhabit*.
- a. *Sanad sahih al-Bukhari*

Imam Abu al-Fadhl mengatakan, “Sesungguhnya *al-Bukhari* dan *Muslim* serta ahli hadith selepas kedua-duanya, tidak pernah mengatakan, “Aku mensyaratkan perawi-perawi yang terdapat di dalam kitab ini menurut syarat-syarat tertentu, tetapi diketahui syarat-syarat itu berdasarkan kajian kitab-kitab mereka.” Daripada kajian tersebut diketahui bahawa *al-Bukhari* dan *Muslim* mensyaratkan perawi-perawi itu hendaklah *thiqah* dan *kethiqahan* mereka tidak diperakui oleh para ulama yang *thiqah*. Kedua-duanya tidak mensyaratkan bahawa perawi-perawi yang mengambil hadith itu lebih dari seorang, tetapi perawi itu mestilah *thiqah*. Sanadnya hendaklah berhubung di antara satu sama lain sehingga sampai kepada *sahabat* yang menyampaikan sesuatu hadith daripada Rasulullah S.A.W.. Hanya *Muslim* meriwayatkan hadith-hadith yang diriwayatkan daripada perawi-perawi yang ditinggalkan oleh *al-Bukhari*. Sungguh pun begitu beliau telah menghilangkan keraguan yang dihadapkan kepada perawi-perawi itu.

b. *Matan hadith*

Sebagaimana yang telah disebutkan bahawa para ulama telah membuat kaedah-kaedah untuk mengesan hadith palsu dari segi *matan*, atau dengan lain perkataan membezakan *matan hadith sahibh* daripada yang tidak *sahih*. Namun perlu diketahui bahawa penekanan yang lebih untuk mengetahui hadith yang palsu ialah melalui *sanad*. Apabila *sanad* hadith itu *sahih*, maka *matan* hadith itu diterima atau sekurang-kurangnya tawaquf.

Perlu diambil perhatian bahawa nas yang dibahaskan untuk diterima atau ditolak itu ialah yang berhubung dengan Muhammad S.A.W.. Rasulullah tidak boleh disamakan dengan manusia yang lain kerana baginda mendapat wahyu daripada Allah. Maka untuk menerima sesuatu yang dihubungkan kepada Rasulullah tidak seharusnya menggunakan ukuran yang diberikan kepada manusia biasa. Kemungkinan sesuatu yang diperkatakan oleh Rasulullah S.A.W. itu belum dapat diterima oleh akal pada masa itu tetapi akan diterima kebenarannya selepasnya kelak. Satu perkara harus diketahui bahawa ilmu pengetahuan dan akal manusia terbatas dan tidak menandingi ilmu dan wahyu Allah.

### 2.7.3 IMAM MUSLIM

#### 2.7.3.1 RIWAYAT HIDUP IMAM MUSLIM

Nama sebenar Imam *Muslim* ialah Muslim Bin al-Khajjaj Bin Muslim al-Qushairi al-Nisabury. Imam *Muslim* lahir pada tahun 206 Hijrah dan meninggal dunia pada usia 55 tahun iaitu pada hari Ahad bersamaan 5 Rejab tahun 261 Hijrah. Beliau dikebumikan di sebuah kampung yang dikenali sebagai kampung *Nasr Abad* di luar kota *Naisabur*. Keluarga beliau merupakan golongan ahli ulama. Bapa beliau iaitu al-Khajjaj adalah merupakan antara ahli ulama yang masyhur di zaman itu. Imam *Muslim* telah mengarang kitab *as-Sahih* yang terkenal dengan kitab *Sahih Muslim* dan merupakan kitab yang kedua terkenal selepas *Sahih al-Bukhari*.

### 2.7.3.2 PENDIDIKAN IMAM MUSLIM

Sebagai seorang ulama, Imam *Muslim* telah mempelajari ilmu hadith mulai tahun 218 H di negeri beliau sendiri. Selain daripada negeri beliau sendiri, negeri yang menjadi tempat pengajian Imam *Muslim* ialah *Hijaz*, *Iraq*, *Syam*, *Mesir* dan beberapa negara lain. Guru-guru Imam *Muslim* ialah Yahya Bin Yahya al-Nisabury, Qathibah Bin Saad, Abdullah Bin Muslimah al-Qa`naby, Ahmad Bin Yunus, Sa`id Bin Mansur dan banyak lagi yang telah menjadi guru kepada Imam *Muslim* sepanjang pengajiannya dalam ilmu hadith.

Selain guru yang telah disebutkan, guru yang sentiasa didampingi oleh Imam *Muslim* ialah Imam *al-Bukhari* yang ketika itu telah datang ke *Naisabur*. Imam *Muslim* telah belajar dan menyanjung tinggi gurunya itu sebagai seorang tokoh ilmu hadith yang masyhur dan begitu dihormati. Sewaktu berlakunya perselisihan faham antara Imam *al-Bukhari* dan al-Zihli yang juga merupakan guru Imam *Muslim* dalam masalah *Ibadat Makhluqah*, al-Zihli telah melarang murid-muridnya daripada mempelajari ilmu bersama Imam *al-Bukhari*. Namun demikian Imam *Muslim* telah keluar daripada majlis ilmu tersebut di khalayak ramai kerana tidak berpuas hati atas tindakan gurunya dan memulangkan segala hadith dan tidak meriwayatkan hadith al-Zihli dalam *sahihnya*.

### 2.7.3.3 PANDANGAN ULAMA TERHADAP IMAM MUSLIM

Imam *Muslim* mendapat sanjungan dan menjadi seorang yang disegani dan dihormati di kalangan para ulama serta umat Islam memandangkan keluasan ilmunya dalam bidang hadith, kematangan beliau dalam mengkritik dan menjawab segala masalah yang timbul dalam ilmu hadith khususnya *hadith sahih*, *dhaif* dan *hasan*. Menurut Ishak Bin Mansur sebagaimana yang dinukil oleh Ibn Hajar, “Kami sentiasa mendapat kebaikan selagi engkau masih hidup”.

Selain itu, menurut Muhammad Bin Abdul Wahab telah berkata Ibn Hajar “Muslim adalah daripada kalangan golongan ulama, beliau merupakan gedung ilmu dan seorang yang mulia.” Muslimat Bin al-Qasim berpendapat “Imam *Muslim* adalah seorang yang thiqah dan dihormati oleh para ulama.”

Al-Khatib pula telah berkata, “*Muslim* telah mengikuti jejak Imam *al-Bukhari*, memperhatikan serta mempelajari ilmunya dan menempuh jalan yang dilaluinya.” Di sini, Imam *Muslim* bukannya seorang pengikut Imam *al-Bukhari* tetapi disifatkan sebagai tokoh ilmu hadith yang masyhur selepas Imam *al-Bukhari*. Beliau mempunyai sifat serta ciri-ciri yang tersendiri dalam menyusun kitab serta kaedah baru yang belum diperkenalkan oleh orang lain.

#### 2.7.3.4 KARYA-KARYA IMAM MUSLIM

Imam *Muslim* telah mengarang banyak buku mengenai hadith-hadith sahih yang merupakan kitab-kitab yang masyhur di seluruh negara Islam. Beliau mengarang kitabnya bersama ilmu pengetahuannya yang sangat luas mengenai ‘ilah-‘ilah dan kaitan dalam selok – belok ilmu hadith. Antara kitab-kitab karangannya ialah:

1. Kitab *Asma wa al-Kuna*
2. Kitab *Afradh al-Sami`in*
3. Kitab *al-Iqrان*
4. Kitab *al-Intifa` bi Julud al-Saba`*
5. Kitab *Awlad al- Sahabat*
6. Kitab *Awham al-Muhaddithin*
7. Kitab *al-Tarikh*
8. Kitab *al-Tamyiiz*
9. Kitab *al-Jami` al-Kubra `ala al-Abwab*
10. Kitab *Rijal `Urwah*
11. Kitab *al-`Alal*
12. Kitab *al-Mukhadharin*
13. Kitab *al-Musnad al-Kabir*
14. Kitab *al-Wakhdani*
15. Kitab *al-Sahih al-Musnad*

### 2.7.3.5 KITAB SAHIH IMAM MUSLIM

Sahih *Muslim* adalah sebuah kitab hadith yang tidak asing di kalangan ahli hadith selepas kitab *sahih al-Bukhari*, kerana ketinggian pengesahan dan kesahihannya. Isi kandungannya juga sepertimana kitab *sahih al-Bukhari* iaitu hanya hadith-hadith yang sahih sahaja dikumpulkan, sepertimana katanya “(انما أخرت هذا الحديث من الصحيح ليكون مجموعاً عندى) وعند من يكتبه عنى ولا يرتاب في صحته” maksudnya “Aku kumpulkan hadith ini dari yang sahih sahaja supaya aku dan orang yang menulis hadith daripada aku mempunyai satu kumpulan hadith yang tidak diragui kebenarannya.”

### 2.7.3.6 BILANGAN SAHIH MUSLIM

Menurut al-Khatib al-Baghdadi bahawa beliau telah mengumpulkan hadith yang terdapat di dalam sahihnya itu daripada 300,00 hadith yang telah dipelajarinya. Daripada jumlah tersebut, beliau telah memilih 4,000 hadith, tidak termasuk yang terulang.

## 2.8 HADITH SAHIH YANG TERDAPAT DI DALAM SAHIH AL-BUKHARI DAN SAHIH MUSLIM

Satu perkara yang sepatutnya diperhatikan bahawa Imam *al-Bukhari* dan *Muslim* tidak mensyaratkan kedua-dua sahih mereka. Hafiz ibn Katsir (774H), menerangkan bahawa Imam *al-Bukhari* dan *Muslim* mengakui akan pengesahan beberapa hadith yang tidak terdapat di dalam sahih mereka. Imam Tirmizi dan tokoh-tokoh yang lain telah mengatakan bahawa Imam *al-Bukhari* telah mengakui beberapa hadith yang tidak terdapat di dalam sahihnya sebagai hadith sahih.

( ما اد خلت في ) Imam *al-Bukhari* berkata sebagaimana yang dinukil oleh al-Sayuti (كتاب الجامع الا ما صح وتركت من الصحاح مخافة الطول) maksudnya: "Aku tidak masukkan hadith-hadith ke dalam jami' (*Sahih al-Bukhari*) kecuali hadith yang sahih dan aku tinggalkan banyak *hadith sahih* kerana takut kitabku itu terlampaui panjang."

Imam *Muslim* pula pernah menerangkan sebagaimana yang dinukil oleh al-Sayuti (ليس كل شيء عندى صحيح وضعته هنا إنما وضعت ما اجمعوا عليه) Maksudnya “Tidak semua hadith yang sahih menurut pandanganku itu, aku masukkan ke dalam kitabku ini, tetapi apa yang aku masukkan ialah hadith yang diijma’kan oleh ulama.” Untuk menjelaskan lagi maksud perkataan Imam *Muslim* itu, perlu dilihat perkataan yang dinukil oleh Imam Nawawi daripada *Muslim* katanya (انما أخرجت هذا الكتاب وقلت هو صاحح ولم أقل ان ما لم أخرجه من الحديث في هذا الكتاب فهو ضعيف.) maksudnya “Aku kumpulkan hadith-hadith ke dalam kitab ini, dan hadith-hadith itu adalah *sahih*. Tetapi aku tidak mengatakan hadith-hadith yang aku tidak memasukkan ke dalam kitab ini adalah *dhaif*.”

### 2.8.1 KEHUJAHAN HADITH UNTUK BERAMAL

Apabila *thabit* suatu hadith itu sebagai *hadith sahih* ia adalah menjadi hujah dan wajib beramal dengannya sekalipun hadith itu *ahad*.

#### a. Kedudukan *Hadith Sahih* Dalam Perundangan.

Kita boleh berhujah dengan *hadith sahih* kerana:

- i. Hadith ini berada dalam susunan yang iltizam dengan kesahihan apabila perawinya terdiri daripada orang *thiqah* seperti *sahih al-Bukhari* dan *sahih Muslim*.
- ii. Hadith ini diakui kesahihannya oleh imam yang boleh dipercayai dalam mentashihkan hadith dan terkenal sebagai seorang yang tidak cuai.
- iii. Hadith ini tidak menyeleweng dan menepati kesahihan dan kebenaran hadith daripada Rasulullah S.A.W..

Kesemua pengasas mazhab-mazhab berkenaan walaupun tidak sama dari sudut hafalan dan pengetahuan telah berijma’ bahawa setiap hadith yang sahih mestilah didahului ke atas qias dan ijтиhad sendiri. Setiap imam menegaskan, “Apabila terdapat hadith yang sahih maka dengan sendirinya ia adalah mazhabku”.

Imam al-Syafie berkata, penggabungan antara sunnah dengan kitab Allah bukan sahaja dalam urusan halal dan haram tetapi juga pada setiap urusan tasyri’ (perundangan), yang penting Rasulullah S.A.W. tidak akan menghalalkan sesuatu melainkan perkara yang

dihalalkan oleh Allah di dalam kitabNya dan tidak akan mengharamkan sesuatu melainkan perkara yang diharamkan oleh Allah di dalam kitabNya. Al-Quran dan al-Hadith adalah sama kerana kedua-duanya adalah wahyu daripada Allah S.W.T berdalilkan kepada firman Allah yang bermaksud:

*'Ucapannya itu tiada lain hanyalah wahyu yang diwahyukan (kepadanya).*

(Surah al-Najm 53:4)

Pengetahuan para *sahabat* terhadap sunnah adalah tidak sama. Berdasarkan kepada pengetahuan yang ada para *sahabat* mempunyai cara yang berlainan antara satu sama lain ketika memberi alasan terhadap sesetengah hukum, menentukan bacaan dan makna bagi satu-satu perkataan dan sejauh mana ijтиhad serta istinbat yang mereka lakukan itu bersesuaian dengan sunnah Rasulullah S.A.W.

### b. Kehujahan Hadith Ahad\*

Sesetengah *hadith ahad* termasuk dalam kategori *hadith sahih*. Oleh itu dari segi penerimaannya sama taraf dengan *hadith-hadith sahih* yang lain.

Syarat yang paling penting yang pernah dikenakan oleh Imam al-Ra'yi ke atas *hadith ahad* ialah hadith tersebut hendaklah tidak bertentangan dengan usul yang telah

---

\* .. Contohnya Ibn Mas'ud telah ditanya tentang masalah seorang isteri yang kematian suaminya sebelum mas kahwinnya ditetapkan. Lalu beliau menjawabnya: "aku tidak pemah melihat Rasulullah s.a.w menghukumkan perkara seperti ini." Ini menyebabkan mereka berselisih pendapat dan bersungguh-sungguh untuk mendapatkan jawapan bagi masalah ini selama sebulan. Maka Ibn Mas'ud berijтиhad dan menghukumkan supaya isteri berkenaan diberi mahar ( mas kahwin) mengikut nilai mahar yang diberikan oleh suami berkenaan kepada isteri-isterinya yang lain. Isteri berkenaan juga mempunyai edah dan berhak menerima pusaka. Tiba-tiba Ma'aqal bin Yasar berdiri dan menyatakan bahawa Rasulullah s.a.w sendiri pernah menjatuhkan hukuman seperti itu kepada seorang perempuan kaum mereka. Ibn Mas'ud merasa sangat gembira apabila mendengarnya. Kadangkala ijтиhad seorang *sahabat* muwafaqah iaitu sejajar dengan hadis, seperti yang terdapat dalam riwayat al-Nassa'i berhubung dengan masalah seperti di atas.

Banyak perselisihan berlaku dan para Tabi'in cuba juga mentaufiqkan (menyelaraskan) serta menjelaskan antara pendapat yang bercanggah dengan sebaik mungkin. Di sini dapat diketahui bahawa setiap negeri mempunyai mazhab dan imamnya masing-masing. Daripada imamalah diminta sebarang fatwa bagi setiap masalah yang timbul.

dijima'kan sesudah diteliti segala sumber (hukum) syarak. *Hadith ahad* tidak bertentangan dengan keumuman dan zahir al-Quran. *Hadith ahad* tidak bertentangan dengan *hadith masyhur*, sama ada kata-kata mahupun perbuatan Rasulullah S.A.W.. *Hadith ahad* juga tidak bertentangan dengan amalan yang diwarisi turun-temurun antara para *sahabat* dengan tabi'in di seluruh negeri. Hadith berkenaan tidak pernah ditolak oleh mana-mana *sahabat* sebagai hujah dengan hadith yang diriwayatkan oleh mereka (*sahabat*). Tidak berlaku penambahan pada hadith berkenaan oleh mana-mana perawi secara persendirian, sama ada pada *matan* mahupun *sanad*.

Imam Malik bin Anas adalah seorang imam dari *Madinah al-Munawwarah* yang digelar sebagai Dar al-sunnah al-Musyarrrafah dan kitab karangannya yang bernama al-Muwatta' dianggap cara ilmu menurut pandangan *ahli al-hadith*. Beliau telah berhujah tentang hadith secara amali dan tatbiqi (praktik). Imam Malik berpendapat bahawa khabar atau *hadith ahad* adalah (sabit) secara qat'i yang mendatangkan ilmu yang yakin dan beramat secara wajib.

Ahmad bin Hanbal dalam kitab Musnadnya menunjukkan kedudukan sunnah yang begitu agung dalam bidang tasyri'. Apabila beliau mendapati ada nas, beliau akan memberi fatwa mengikut kehendak nas berkenaan dan tidak menghiraukan pendapat sesiapa sahaja yang bertentangan dengan nas. Keterangan di atas menguatkan lagi pendapat bahawa beliau adalah imam yang besar dan terkemuka, begitu arif dengan kedudukan hadith. Masyarakat menganggapnya sebagai sumber kedua bagi tasyri' (perundangan).

Ramai *sahabat*, *tabi'in*, *imam* yang menggunakan hadith dalam menyelesaikan sesuatu hukum. Namun masih lagi menjadi khilaf di kalangan mereka ke atas keyakinan *hadith ahad*. Kita boleh menggunakan *hadith ahad* sebagai sumber hukum namun ada syarat-syaratnya. Kebanyakannya ramai yang menolak *hadith ahad* dan masih sangsi akan keyakinannya. Contohnya Abu Bakar pernah menolak hadith yang diriwayatkan oleh al-Mughirah tentang pusaka yang dapat diterima oleh pihak (perempuan), sehingga ia diperkuatkan lagi oleh khabar atau hadith yang diriwayatkan oleh Muhammad bin Maslamah.

Sebenarnya *sahabat* berhujah dengan *hadith ahad* dan beramat dengan kandungannya. Mereka didapati sukar untuk menerima sebahagian hadith dan menolaknya

semata-mata kesangsian, mencari keyakinan dan begitu berhati-hati dalam meriwayatkan hadith. Kita tidak boleh menerima *hadith ahad* sewenang-wenangnya. Banyak perkara yang perlu diteliti agar hadith itu betul-betul boleh dijadikan hujah. Sekiranya sesuatu hadith itu sahih maka ia akan menjadi satu sumber bagi sumber-sumber hukum. Tidak perlu lagi kita membandingkan dengan sumber lain seperti qias kerana qias itu sekadar menyokong dan menguatkan sumber kedua (hadith) itu.

Beramal dengan *hadith ahad* yang sahih adalah sah. Jumhur ulama berpendapat *khabar ahad yang thiqah* adalah menjadi hujah dan wajib beramal dengannya. Sebahagian ulama seperti Imam Ahmad, al-Harith Bin Asad al-Muhasibi, al-Hussin Bin ‘Ali al-Karabisi, Abu Sulaiman dan Malik berpendapat bahawa *hadith ahad* adalah *qat'i* yang pasti mendatangkan ilmu yakin. Ibn Hazm menegaskan: “Sesungguhnya *khabar ahad* yang diriwayatkan oleh perawi *adil* yang diambil daripada perawi yang sama sifatnya sehingga sampai kepada Rasulullah S.A.W. pasti mendatangkan ilmu yang yakin dan sekaligus wajib beramal dengannya.” Khatib al-Baghdadi menegaskan bahawa wajib beramal dengan *hadith ahad* yang sahih dan boleh dijadikan sebagai hujah.

*Hadith sahih* boleh dijadikan hujah dengan beberapa sebab antaranya *khabar ahad* adalah sah *sanadnya*, malahan juga dengan khabar yang kuat atau disokong oleh berbagai sebab dan keadaan. Ulama *muhaqqiqun* menganggap hadith seperti ini adalah hadith ilmu yang yakin (*qat'i*). Malahan mereka mengatakannya lebih kuat daripada sudut ilmu yang memberi keyakinan berbanding turuq yang banyak tetapi tidak sampai kepada peringkat mutawatir. Namun demikian mereka lebih mengutamakan hadith-hadith yang tidak dikritik oleh para *huffaz* dan tidak mengandungi makna yang bertentangan yang tidak membolehkannya ditarikhkan antara satu sama lain. Ini kerana adalah mustahil dua hadith yang bertentangan dikira sebagai benar tanpa ditarikhkan antara satu sama lain.

## BAB TIGA

### **PELAKSANAAN PROGRAM TAKHRIJ HADITH SAHIH AL-BUKHARI DAN SAHIH MUSLIM DALAM BAB IMAN DAN AQIDAH**

#### **3.1 Pemilihan Bahan**

3.1.1 Penyelidikan ini merujuk kepada dua buah buku iaitu *Sahih al-Bukhari* (sebanyak empat jilid) dan *Sahih Muslim* (sebanyak enam jilid). Bab yang menjadi rujukan hanyalah bab yang menyentuh tentang persoalan iman dan akidah.

3.1.2 Perbincangan juga turut merujuk kepada beberapa software hadith seperti *al-Hadith al-Syarif* yang merangkumi 9 kitab hadith dan juga *al-Bayan* yang mengandungi kumpulan hadith-hadith sahih.

#### **3.2 Peralatan Yang Digunakan**

Penyelidikan ini memerlukan peralatan-peralatan yang tertentu bagi memudahkan dan menyempurnakan kerja dengan lebih efektif. Kecanggihan teknologi pada masa kini membolehkan peralatan yang digunakan pun lebih moden. Dengan segala kemudahan ini, menjadikan Penyelidikan ini mampu mencapai kualiti yang tinggi untuk dibuat rujukan. Antara peralatan yang digunakan adalah;

##### **3.2.1 Sebuah Komputer**

Sebuah barang elektrik yang mampu menyimpan pelbagai data dan maklumat. Kemudahan ini membolehkan maklumat yang terperinci boleh dilayari dalam web yang terdapat dalam internet. Sistem telekomunikasi menjadikan segala yang ada di dunia dapat diketahui dalam jangka masa yang singkat.

### 3.2.2 Cakera Padat (CD) Writer

Perkakasan yang digunakan untuk menyalin segala data-data dan maklumat. Ianya perlu disimpan dengan baik ke dalam cakera padat. Hanya penggunaan sekeping cakera sahaja mampu membuka banyak maklumat.

### 3.2.3 Mesin Pencetak

Akhirnya maklumat yang perlu dirujuk berdasarkan kepada hasil kerja dan maklumat yang dicetak ke kertas.

## 3.3 Pelaksanaan Projek Takhrij

Takhrij hadith telah dilakukan oleh para penyelidik dengan merujuk kepada semua matan-matan hadith sahih secara berperingkat. Penyelidik telah mengagihkan hadith-hadith berdasarkan topik yang sepatutnya. Hadith-hadith ini kemudiannya diasingkan mengikut tajuk-tajuk yang bersesuaian dengannya.

## 3.4 Pengeditan Takhrij

Kesemua hadith-hadith yang telah dikumpulkan telah diedit semula sama ada pada penulisan dan terjemahannya berdasarkan kitab-kitab hadith Sahih Al-Bukhari dan Muslim.

## BAB EMPAT

### **HASIL TAKHRIJ HADITH SAHIH AL-BUKHARI DAN MUSLIM DALAM BAB IMAN DAN AKIDAH**

#### a. Iman

حَدَّيْثُ أَبِي هُرَيْرَةَ رَضِيَ اللَّهُ عَنْهُ : أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ إِنَّ الْإِيمَانَ لَيَأْرُزُ إِلَى  
الْمَدِينَةِ كَمَا تَأْرُزُ الْحَيَّةُ إِلَى جُحْرِهَا

Diriwayatkan daripada Abu Hurairah r.a katanya: Rasulullah s.a.w bersabda: Sesungguhnya iman itu berlindung iaitu merimbun di Madinah, sebagaimana ular berlindung di dalam sarangnya.

حَدَّيْثُ حُذِيفَةَ رَضِيَ اللَّهُ عَنْهُ قَالَ : كُلَّا مَعَ رَسُولِ اللَّهِ صَلَّى اللَّهُ عَلَيْهِ وَسَلَّمَ فَقَالَ أَخْصُوا لِي كُمْ يَأْفِظُ  
الْإِسْلَامَ قَالَ فَقُلْنَا يَا رَسُولَ اللَّهِ أَتَخَافُ عَلَيْنَا وَتَحْنُّ مَا بَيْنَ السَّتْتِ مَائَةٍ إِلَى السَّبْعِ مَائَةٍ قَالَ إِنَّكُمْ لَا تَدْرُونَ  
لِعَلَّكُمْ أَنْ تُبَتَّلُوا قَالَ فَابْتَلِنَا حَتَّى جَعَلَ الرَّجُلُ مِنَ لَا يُصْلِي إِلَّا سِرًّا

Diriwayatkan daripada Huzaifah r.a katanya: Rasulullah s.a.w bersabda ketika kami bersamanya: Kumpulkan untukku beberapa orang sahabat yang boleh menyatakan Islam. Kata Huzaifah: Kami menjawab: Wahai Rasulullah! Adakah engkau bimbangkan kami, sedangkan kami berjumlah antara enam hingga tujuh ratus orang. Rasulullah s.a.w bersabda: Kamu tidak dapat menyangka bahawa suatu hari nanti kamu akan diuji. Huzaifah berkata: Ujilah kami walaupun sehingga Sahabat-sahabat kami terpaksa mendirikan sembahyang secara sembunyi

حَدِيثُ أَبِي هُرَيْرَةَ رَضِيَ اللَّهُ عَنْهُ : أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ لَا تَقُومُ السَّاعَةُ حَتَّى تَطْلُعَ الشَّمْسُ مِنْ مَغْرِبِهَا فَإِذَا طَلَعَتْ مِنْ مَغْرِبِهَا آمَنَ النَّاسُ كُلُّهُمْ أَجْمَعُونَ فِي يَوْمٍ مَيْدِنٍ ( لَا يَنْفَعُ نَفْسًا إِيمَانُهَا لَمْ تَكُنْ آمَنَتْ مِنْ قَبْلُ أَوْ كَسَبَتْ فِي إِيمَانِهَا خَيْرًا )

Diriwayatkan daripada Abu Hurairah r.a katanya: Rasulullah s.a.w bersabda: Hari Kiamat tidak akan berlaku sehingga matahari terbit dari arah barat. Seandainya seluruh manusia beriman kepada Allah s.w.t ketika matahari terbit dari arah barat, maka pada waktu itu ( لَا يَنْفَعُ نَفْسًا إِيمَانُهَا لَمْ تَكُنْ آمَنَتْ مِنْ قَبْلُ أَوْ كَسَبَتْ فِي إِيمَانِهَا خَيْرًا ) Yang bermaksud: Tidak berfaedah lagi iman seseorang yang tidak beriman sebelumnya atau tidak berusaha mengerjakan kebaikan terhadap imannya

حَدِيثُ أَبِي ذِرَّ رَضِيَ اللَّهُ عَنْهُ : أَنَّ النَّبِيَّ صَلَّى اللَّهُ عَلَيْهِ وَسَلَّمَ قَالَ يَوْمًا أَنْدَرُونَ أَيْنَ تَذَهَّبُ هَذِهِ الشَّمْسُ قَالُوا اللَّهُ وَرَسُولُهُ أَعْلَمُ قَالَ إِنَّ هَذِهِ تَجْرِي حَتَّى تَنْتَهِي إِلَى مُسْتَقْرِرٍ هَا تَحْتَ الْعَرْشِ فَتَخْرُجُ سَاجِدًا فَلَا تَرَأَلُ كَذَلِكَ حَتَّى يُقَالَ لَهَا ارْتَقَعَي ارْجِعيَّ مِنْ حَيْثُ جِئْتَ فَتَرْجِعُ فَتُصْبِحُ طَالِعَةً مِنْ مَطْلِعِهَا ثُمَّ تَجْرِي حَتَّى تَنْتَهِي إِلَى مُسْتَقْرِرٍ هَا تَحْتَ الْعَرْشِ فَتَخْرُجُ سَاجِدًا وَلَا تَرَأَلُ كَذَلِكَ حَتَّى يُقَالَ لَهَا ارْتَقَعَي ارْجِعيَّ مِنْ حَيْثُ جِئْتَ فَتَرْجِعُ فَتُصْبِحُ طَالِعَةً مِنْ مَطْلِعِهَا ثُمَّ تَجْرِي لَا يَسْتَكِرُ النَّاسُ مِنْهَا شَيْئًا حَتَّى تَنْتَهِي إِلَى مُسْتَقْرِرٍ هَا ذَاكَ تَحْتَ الْعَرْشِ فَيُقَالُ لَهَا ارْتَقَعَي أَصْبِحَّي طَالِعَةً مِنْ مَغْرِبِكَ فَتُصْبِحُ طَالِعَةً مِنْ مَغْرِبِهَا فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ أَنْدَرُونَ مَتَى ذَاكَ حِينَ ( لَا يَنْفَعُ نَفْسًا إِيمَانُهَا لَمْ تَكُنْ آمَنَتْ مِنْ قَبْلُ أَوْ كَسَبَتْ فِي إِيمَانِهَا خَيْرًا )

Diriwayatkan daripada Abu Zar r.a katanya: Suatu Hari Nabi s.a.w bersabda: Tahukah kamu ke mana matahari ini pergi Para Sahabat menjawab: Allah dan RasulNyalah yang lebih mengetahui. Lantas Rasulullah s.a.w bersabda: Perjalanan matahari ini berakhir di suatu tempat yang telah ditetapkan di bawah Arasy, lalu merebahkan diri untuk bersujud. Ia tetap berada dalam keadaan tersebut, sehingga diperintahkan kepadanya: Bangunlah dan kembalilah ke tempat mana kamu datang. Matahari kemudiannya kembali sehingga ia terbit dan beredar sebagaimana biasa. Matahari terus beredar lagi sehingga sampai di suatu tempat yang ditetapkan di bawah Arasy lalu merebahkan lagi dirinya untuk bersujud. Ia juga tetap berada dalam keadaan demikian sehingga diperintahkan kepadanya: Bangunlah dan kembalilah ke tempat mana kamu datang. Matahari kembali lagi sehingga ia terbit dan beredar sebagaimana biasa tanpa diketahui oleh manusia dan

berakhir pada tempat yang telah ditetapkan di bawah Arasy, lalu bersujud dan tetap dalam keadaan demikian, sehingga akhirnya diperintahkan kepadanya: Bangunlah dan terbitlah dari sebelah barat. Rasulullah s.a.w terus bersabda: Tahukah kamu bilakah ianya akan berlaku Ianya akan berlaku ketika mana. لا ينفع نفساً إيمانها لِمَ تَكُنْ آمَنَتْ مِنْ قَبْلُ أَوْ كَسَبَتْ فِي إِيمَانَهَا حَيْرًا ( Yang bermaksud: "Tidak berfaedah lagi iman seseorang yang tidak beriman sebelumnya atau tidak berusaha mengerjakan kebaikan terhadap imannya "

### b. Dosa-dosa Besar

حَدَّيْثُ عَبْدِ اللَّهِ بْنِ مَسْعُودٍ رَضِيَ اللَّهُ عَنْهُ قَالَ : سَأَلْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ أَيُّ الدَّنْبُ أَعْظَمُ عِذَّةَ اللَّهِ قَالَ أَنْ تَجْعَلَ لِلَّهِ نِذِيرًا وَهُوَ خَلْقُكَ قَالَ فَلَمْ تَلِمْنَدْ لَعَظِيمًا قَالَ فَلَمْ تُمْ أَيِّدِ فَلَمْ تَمْ تَعْلَمْ وَلَذِكْ مَخَافَةً أَنْ يَطْعَمَ مَعَكَ قَالَ فَلَمْ تُمْ أَيِّدِ قَالَ تَمْ أَنْ تُزَانِي حَلِيلَةَ جَارِكَ

Diriwayatkan daripada Abdullah bin Masud r.a katanya: Aku bertanya Rasulullah s.a.w: Apakah dosa yang paling besar di sisi Allah Rasulullah s.a.w bersabda: Engkau menjadikan iaitu menganggap ada yang sebanding dengan Allah sedangkan Dialah yang menciptakanmu. Aku berkata: Sesungguhnya dosa demikian memang besar. Kemudian apa lagi Baginda bersabda: Kemudian engkau membunuh anakmu kerana bimbang dia makan bersamamu iaitu makananmu. Aku bertanya lagi: Kemudian apa lagi Rasulullah s.a.w bersabda: Jika engkau berzina dengan isteri jiranmu

حَدَّيْثُ أَبِي بَكْرَةَ رَضِيَ اللَّهُ عَنْهُ قَالَ : كُلَا عِذَّةَ رَسُولِ اللَّهِ صَلَّى اللَّهُ عَلَيْهِ وَسَلَّمَ فَقَالَ إِلَيْهِ أَنْبِئْكُمْ بِأَكْبَرِ الْكَبَائِرِ ثَلَاثَةِ إِلَشْرَاكٍ بِاللَّهِ وَعُغْوَقُ الْوَالَدَيْنِ وَشَهَادَةُ الزُّورِ أَوْ قَوْلُ الزُّورِ وَكَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ مُنْكِرًا فَجَلَسَ فَمَا زَالَ يُكَرِّرُهَا حَتَّى فَتَنَا لِيَتَهُ سَكَتَ

Diriwayatkan oleh Abu Bakrah r.a katanya: Ketika kami bersama Rasulullah s.a.w, baginda telah bersabda: Mahukah aku ceritakan kepada kamu sebesar-besarnya dosa besar Ianya tiga perkara, iaitu mensyirikkan Allah, mengherdik kedua ibu bapa dan bersaksi palsu atau kata-kata palsu. Semasa Rasulullah bersabda, baginda sedang bersandar lalu duduk.

Baginda terus mengulangi sabdanya sehingga kami berkata: Semoga baginda berhenti dari menyebut Hadith tersebut .

**حَدِيثُ أَنَسٍ رَضِيَ اللَّهُ عَنْهُ : عَنِ النَّبِيِّ صَلَّى اللَّهُ عَلَيْهِ وَسَلَّمَ فِي الْكَبَائِرِ قَالَ الشَّرْكُ بِاللَّهِ وَعُغْوَقُ الْوَالَّدَيْنِ وَقَتْلُ النَّفْسِ وَقَوْلُ الزُّورِ**

Diriwayatkan daripada Anas bin Malik r.a katanya: Nabi s.a.w pernah menceritakan tentang dosa-dosa besar. Baginda bersabda: Menyekutukan Allah, mengherdik kedua-dua ibubapa, membunuh dan berkata dengan kata-kata palsu

**حَدِيثُ أَبِي هُرَيْرَةَ رَضِيَ اللَّهُ عَنْهُ : أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ اجْتَنِبُوا السَّبْعَ الْمُؤِيَّقَاتِ قِيلَ يَا رَسُولَ اللَّهِ وَمَا هُنَّ قَالَ الشَّرْكُ بِاللَّهِ وَالسَّحْرُ وَقَتْلُ النَّفْسِ الَّتِي حَرَّمَ اللَّهُ إِلَّا بِالْحَقِّ وَأَكْلُ مَالِ الْبَيْتِينَ وَأَكْلُ الرِّبَّا وَالْوَلَّيْ يَوْمَ الزَّحْفِ وَقَذْفُ الْمُحْسَنَاتِ الْغَافِلَاتِ الْمُؤْمَنَاتِ**

Diriwayatkan daripada Abu Hurairah r.a katanya: Rasulullah telah bersabda: Jauhilah tujuh perkara yang boleh membinasakan kamu iaitu menyebabkan kamu masuk Neraka atau dilaknati oleh Allah. Para Sahabat bertanya: Wahai Rasulullah! Apakah tujuh perkara itu Rasulullah bersabda: Mensyirikkan Allah iaitu menyekutukanNya, melakukan perbuatan sihir, membunuh manusia yang diharamkan oleh Allah melainkan dengan hak, memakan harta anak yatim, memakan harta riba, lari dari medan pertempuran dan memfitnah perempuan-perempuan yang baik iaitu yang boleh dikahwini serta menjaga maruah dirinya, juga perempuan yang tidak memikirkan untuk melakukan perbuatan jahat serta perempuan yang beriman dengan Allah dan RasulNya dengan fitnah melakukan perbuatan zina

**حَدِيثُ أَبِي هُرَيْرَةَ رَضِيَ اللَّهُ عَنْهُ قَالَ : قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ مَنْ قَتَلَ نَفْسَهُ بِحَدِيدَةٍ فَحَدِيدَتُهُ فِي يَدِهِ يَتَوَجَّا بِهَا فِي بَطْنِهِ فِي نَارِ جَهَنَّمَ خَالِدًا مُخْلَدًا فِيهَا أَبَدًا وَمَنْ شَرَبَ سَمًا فَقَتَلَ نَفْسَهُ فَهُوَ يَتَحَسَّأُ فِي نَارِ جَهَنَّمَ خَالِدًا مُخْلَدًا فِيهَا أَبَدًا وَمَنْ تَرَدَّى مِنْ جَبَلٍ فَقَتَلَ نَفْسَهُ فَهُوَ يَتَرَدَّى فِي نَارِ جَهَنَّمَ خَالِدًا مُخْلَدًا فِيهَا أَبَدًا**

Diriwayatkan daripada Abu Hurairah r.a katanya: Rasulullah s.a.w bersabda: Sesiapa yang membunuh dirinya dengan sepotong besi, maka dengan besi yang tergenggam di tangannya itulah dia akan menikam perutnya dalam Neraka Jahanam secara berterusan dan dia akan dikekalkan di dalam Neraka tersebut untuk selama-lamanya. Sesiapa yang membunuh dirinya dengan meminum racun maka dia akan merasai racun itu dalam Neraka Jahanam secara berterusan dan dia akan dikekalkan di dalam Neraka tersebut untuk selama-lamanya. Begitu juga, sesiapa yang membunuh dirinya dengan terjun dari puncak gunung, maka dia akan terjun dalam Neraka Jahanam secara berterusan untuk membunuh dirinya dan dia akan dikekalkan dalam Neraka tersebut untuk selama-lamanya

### c. Syirik Terhadap Allah

**حَدَّيْثُ عَبْدِ اللَّهِ بْنِ مَسْعُودٍ رَضِيَ اللَّهُ عَنْهُ قَالَ : قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ مَنْ مَاتَ يُشْرِكُ بِاللَّهِ شَيْئًا دَخَلَ النَّارَ وَقَالَ أَنَا وَمَنْ مَاتَ لَا يُشْرِكُ بِاللَّهِ شَيْئًا دَخَلَ الْجَنَّةَ**

Diriwayatkan daripada Abdullah bin Mas'ud r.a katanya: Rasulullah s.a.w bersabda: Sesiapa yang mati dalam keadaan menyekutukan Allah dengan sesuatu nescaya akan memasuki Neraka. Maka aku berkata iaitu perawi Hadith: Aku dan orang-orang yang tidak mensyirikkan Allah dengan sesuatu, akan memasuki Syurga

**حَدَّيْثُ أَبِي ذِرٍّ رَضِيَ اللَّهُ عَنْهُ : عَنِ النَّبِيِّ صَلَّى اللَّهُ عَلَيْهِ وَسَلَّمَ أَنَّهُ قَالَ أَنَّا نَحْنُ جِبْرِيلُ عَلَيْهِ السَّلَامُ فَبَشَّرَنِي أَنَّهُ مَنْ مَاتَ مِنْ أَمْتَاكَ لَا يُشْرِكُ بِاللَّهِ شَيْئًا دَخَلَ الْجَنَّةَ ثُلُثٌ وَإِنْ زَوْجٌ وَإِنْ سَرَقَ قَالَ وَإِنْ زَوْجٌ وَإِنْ سَرَقَ**

Diriwayatkan daripada Abu Zar r.a katanya: Nabi s.a.w bersabda: Jibril a.s telah mendatangi aku lalu memberitahu berita gembira, iaitu sesiapa yang mati di kalangan umatku dalam keadaan tidak mensyirikkan Allah dengan sesuatu, nescaya dia akan dimasukkan ke dalam Syurga. Aku bertanya: Walaupun dia berzina dan mencuri Rasulullah bersabda: Walaupun dia berzina dan mencuri

**حَدِيثُ أَبِي هُرَيْرَةَ رَضِيَ اللَّهُ عَنْهُ :** أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ احْتَذُوا السَّبَعَ الْمُؤْيَقَاتِ قَيلَ يَا رَسُولَ اللَّهِ وَمَا هُنَّ قَالَ الشَّرْكُ بِاللَّهِ وَالسَّحْرُ وَقَتْلُ النَّفْسِ الَّتِي حَرَّمَ اللَّهُ إِلَّا بِالْحَقِّ وَأَكْلُ مَالِ الْبَيْتِيْنِ وَأَكْلُ الرَّبَّا وَالْتَّوْلَى يَوْمَ الزَّحْفِ وَقَذْفُ الْمُحْصَنَاتِ الْغَافِلَاتِ الْمُؤْمِنَاتِ

Diriwayatkan daripada Abu Hurairah r.a katanya: Rasulullah telah bersabda: Jauhilah tujuh perkara yang boleh membinasakan kamu iaitu menyebabkan kamu masuk Neraka atau dilaknat oleh Allah. Para Sahabat bertanya: Wahai Rasulullah! Apakah tujuh perkara itu Rasulullah bersabda: Mensyirikkan Allah iaitu menyekutukanNya, melakukan perbuatan sihir, membunuh manusia yang diharamkan oleh Allah melainkan dengan hak, memakan harta anak yatim, memakan harta riba, lari dari medan pertempuran dan memfitnah perempuan-perempuan yang baik iaitu yang boleh dikahwini serta menjaga maruah dirinya, juga perempuan yang tidak memikirkan untuk melakukan perbuatan jahat serta perempuan yang beriman dengan Allah dan RasulNya dengan fitnah melakukan perbuatan zina

#### d. Ucapan Dua Kalimah Syahadah

**حَدِيثُ الْمُقْدَادِ بْنِ الْإِسْوَدِ رَضِيَ اللَّهُ عَنْهُ :** أَنَّهُ قَالَ يَا رَسُولَ اللَّهِ أَرَأَيْتَ إِنْ لَقِيْتُ رَجُلًا مِنَ الْكُفَّارِ فَقَاتَنِي فَضَرَبَ إِحْدَى يَدَيَ بِالسَّيْفِ فَقَطَعَهَا ثُمَّ لِإِذْ مِنِي بِشَجَرَةٍ فَقَالَ أَسْلَمْتُ لِلَّهِ أَفَأَقْتَلُهُ يَا رَسُولَ اللَّهِ بَعْدَ أَنْ قَالَ لَهُ يَا رَسُولَ اللَّهِ صَلَّى اللَّهُ عَلَيْهِ وَسَلَّمَ لَا تَقْتُلْهُ قَالَ فَقْتُلْتُ يَا رَسُولَ اللَّهِ إِنَّهُ قَدْ قَطَعَ يَدِي ثُمَّ قَالَ ذَلِكَ بَعْدَ أَنْ قَطَعَهَا أَفَأَقْتَلُهُ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ لَا تَقْتُلْهُ فَإِنْ قَتَلْتَهُ فَإِنَّهُ بِمَنْزِلَتِكَ قَبْلَ أَنْ تَقْتُلَهُ وَإِنَّكَ بِمَنْزِلَتِهِ قَبْلَ أَنْ يَقُولَ كَلِمَتَهُ الَّتِي قَالَ

Diriwayatkan daripada Miqdad bin al-Aswad r.a katanya: Beliau telah bertanya Rasulullah s.a.w: Wahai Rasulullah, apakah pendapatmu sekiranya aku berjumpa dengan seorang lelaki dari golongan orang-orang kafir, lalu menyerangku dan memotong salah satu dari tanganku dengan pedangnya. Kemudian dia lari dariku dan berlindung di sebalik sepohon kayu, lalu berkata, aku menyerah diri kerana Allah. Adakah aku boleh membunuhnya selepas dia mengucapkan ungkapan itu Rasulullah bersabda: Janganlah engkau membunuhnya. Miqdad tidak berpuas hati lalu membantah: Wahai Rasulullah! Lelaki itu

telah memotong tanganku kemudian telah mengungkapkan ungkapan tersebut selepas memotongnya, adakah aku boleh membunuhnya Rasulullah s.a.w bersabda: Janganlah kamu membunuhnya, sekiranya kamu membunuh lelaki itu, sesungguhnya dia seperti kamu sebelum kamu membunuhnya dan sesungguhnya kamu sepertinya sebelum dia mengucapkan perkataan tersebut

حَدِيثُ أَسَامَةَ بْنِ زَيْدٍ رَضِيَ اللَّهُ عَنْهُمَا قَالَ : بَعَثَنَا رَسُولُ اللَّهِ صَلَّى اللَّهُ عَلَيْهِ وَسَلَّمَ فِي سَرِيَّةٍ فَصَبَّحَنَا الْحُرَقَاتُ مِنْ جُهَيْنَةَ فَأَذْرَكْتُ رَجُلًا فَقَالَ لَا إِلَهَ إِلَّا اللَّهُ فَطَعَنَنِي فَوَقَعَ فِي نَفْسِي مِنْ ذَلِكَ فَذَكَرْتُهُ لِلَّبَنِي صَلَّى اللَّهُ عَلَيْهِ وَسَلَّمَ فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ أَفَلَمْ أَلِمْ لَا إِلَهَ إِلَّا اللَّهُ وَفَتَّلَهُ قَالَ فَلَتُ يَا رَسُولَ اللَّهِ إِنَّمَا قَالَهَا حَوْفًا مِنَ السَّلَاحِ قَالَ أَفَلَا شَفَقْتَ عَنْ قُلْبِهِ حَتَّى تَعْلَمَ أَقْالَهَا أَمْ لَا فَمَا زَالَ يُكَرِّرُهَا عَلَيَّ حَتَّى تَمَكَّنْتُ أَنِّي أَسْلَمْتُ يَوْمَئِذٍ قَالَ فَقَالَ سَعْدٌ وَأَنَا وَاللَّهِ لَا أَقْتُلُ مُسْلِمًا حَتَّى يَقْتُلَهُ دُوَّالُ الْبُطْرِينِ يَعْنِي أَسَامَةَ قَالَ قَالَ رَجُلٌ أَلْمَ يَقُلُ اللَّهُ ( وَقَاتَلُوهُمْ حَتَّى لَا تَكُونَ فِتْنَةً وَيَكُونَ الدِّينُ كُلُّهُ لِلَّهِ ) فَقَالَ سَعْدٌ قَدْ قَاتَلْنَا حَتَّى لَا تَكُونَ فِتْنَةً وَأَنْتَ وَأَصْحَابَكَ تُرِيدُونَ أَنْ تُفَاتِلُوا حَتَّى تَكُونُ فِتْنَةً

Diriwayatkan daripada Usamah bin Zaid r.a katanya: Rasulullah s.a.w telah mengutuskan kami dalam suatu pasukan. Kami sampai di al-Huruqat, suatu tempat di daerah Juhainah pada waktu pagi. Aku berjumpa seorang lelaki, lelaki tersebut menyebut lalu aku menikamnya. Aku menceritakan peristiwa itu kepada Rasulullah. Rasulullah bertanya dengan sabdanya: Adakah kamu membunuhnya sedangkan dia telah mengucapkan kalimah syahadat **لَا إِلَهَ إِلَّا اللَّهُ** Aku menjawab: Wahai Rasulullah! Sesungguhnya lelaki itu mengucap demikian kerana takutkan hayunan pedang. Rasulullah bertanya lagi: Sudahkah engkau membelah dadanya sehingga kamu tahu dia benar-benar mengucapkan Kalimah Syahadat atau tidak. Rasulullah mengulangi soalan itu kepadaku menyebabkan aku bercita-cita untuk menyerah diri pada ketika itu juga. Usamah menceritakan lagi, Saad telah berkata: Demi Allah, aku tidak akan membunuh seorang muslim sehingga ianya telah dilakukan oleh orang yang mempunyai perut yang kecil, iaitu Usamah. Usamah berkata lagi, seorang lelaki telah bertanya: Tidakkah Allah telah berfirman (**وَقَاتَلُوهُمْ حَتَّى لَا تَكُونَ فِتْنَةً وَيَكُونَ الدِّينُ كُلُّهُ لِلَّهِ**) Yang bermaksud: Dan Perangilah mereka sehingga tiada lagi fitnah serta jadikanlah agama itu semata-mata kerana Allah. Maka Saad menjawab:

Sesungguhnya kami memerangi mereka supaya tidak berlaku fitnah, tetapi kamu dan para Sahabat kamu memerangi mereka, untuk menimbulkan fitnah

e. Membunuh Umat Islam

**حَدِيثُ عَبْدِ اللَّهِ بْنِ عُمَرَ رَضِيَ اللَّهُ عَنْهُمَا : أَنَّ النَّبِيَّ صَلَّى اللَّهُ عَلَيْهِ وَسَلَّمَ قَالَ مَنْ حَمَلَ عَلَيْنَا السَّلَاحَ فَلَيْسَ مَنًا**

Diriwayatkan daripada Abdullah bin Umar r.a katanya: Nabi bersabda: Sesiapa yang menghunuskan pedang kepada kami, maka dia tidak termasuk dalam golongan kami

**حَدِيثُ أَبِي مُوسَى رَضِيَ اللَّهُ عَنْهُ : عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ مَنْ حَمَلَ عَلَيْنَا السَّلَاحَ فَلَيْسَ مَنًا**

Diriwayatkan daripada Abu Musa r.a katanya: Nabi s.a.w telah bersabda: Sesiapa yang menghunuskan pedang kepada kami, maka dia tidak termasuk dalam golongan kami

f. Sifat-sifat Buruk

**حَدِيثُ عَبْدِ اللَّهِ بْنِ مَسْعُودٍ رَضِيَ اللَّهُ عَنْهُ قَالَ : قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ لَيْسَ مَنًا مَنْ ضَرَبَ الْخُذُودَ أَوْ شَقَّ الْجُبُوبَ أَوْ دَعَا بِدُعْوَى الْجَاهِلِيَّةِ**

Diriwayatkan daripada Abdullah Ibnu Mas'ud r.a katanya: Rasulullah s.a.w bersabda: Bukan dari golongan kami orang yang menampar pipinya, mengoyak-ngoyak saku bajunya atau berdoa dengan doa orang-orang jahiliah

**حَدِيثُ حُدَيْقَةِ رَضِيَ اللَّهُ عَنْهُ قَالَ : سَمِعْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ يَقُولُ لَا يَدْخُلُ الْجَنَّةَ لَمَّا**

Diriwayatkan daripada Huzaifah r.a katanya: Aku telah mendengar Rasulullah s.a.w bersabda: Tidak masuk Syurga orang yang suka menabur fitnah

حَدَّبَثُ أَبِي هُرَيْرَةَ رَضِيَ اللَّهُ عَنْهُ قَالَ : قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ ثَلَاثٌ لَا يُكَلِّمُهُمُ اللَّهُ يَوْمَ الْقِيَامَةِ وَلَا يُنْظَرُ إِلَيْهِمْ وَلَا يُرَكِّبُهُمْ عَذَابُ أَلِيمٍ رَجُلٌ عَلَى فَضْلٍ مَاءِ بِالْفَلَةِ يَمْنَعُهُ مِنْ أَبْنَ السَّبَيلِ وَرَجُلٌ بَاعَ رَجُلًا بِسُلْعَةٍ بَعْدَ الْعَصْرِ فَحَلَّفَ لَهُ بِاللَّهِ لِإِخْدَاهَا بَكَدًا وَكَذَا فَصَدَّقَهُ وَهُوَ عَلَى غَيْرِ ذَلِكَ وَرَجُلٌ بَاعَ إِمَامًا لِإِلْيَامِهِ إِلَى لِدُنْنِيَا فَإِنْ أَعْطَاهُ مِنْهَا وَقَى وَإِنْ لَمْ يُعْطِهِ مِنْهَا لَمْ يَفِ

Diriwayatkan daripada Abu Hurairah r.a katanya: Rasulullah s.a.w bersabda: Allah tidak akan berkata-kata kepada tiga golongan manusia pada hari kiamat, tidak membersihkan mereka dari dosa dan mereka akan diazab dengan azab siksa yang pedih. Mereka itu ialah seseorang yang mempunyai lebihan air di Padang Sahara tetapi dia enggan memberikan air tersebut kepada musafir yang memerlukan. Seseorang yang menjual barang dagangan selepas waktu asar dan dia bersumpah dengan nama Allah iaitu sumpah bohong bahawa dia membeli barang tersebut dengan harga sekian, menyebabkan pembeli mempercayainya sedangkan dia membelinya bukan dengan harga tersebut. Seseorang yang berikrar setia kepada seorang pemimpin kerana tujuan keduniaan, sekiranya pemimpin berkenaan memenuhi permintaannya dia tetap setia dan jika tidak dia berpaling tada.

## BAB LIMA

### KESIMPULAN

Dunia hari ini semakin berkembang pesat dengan ketinggian dan kecanggihan teknologi dalam pelbagai kegunaan termasuk dalam bidang agama. Penggunaannya dalam bidang agama perlu ditingkatkan demi menyelaraskan *kepentingan agama* dengan kehidupan semasa. Salah satu usaha yang telah dilakukan para ilmuwan Islam pada masa kini ialah menggunakan teknologi berkomputer dalam mengumpulkan hadith dan disimpan dalam bentuk data. Data-data ini dikumpulkan mengikut tajuk atau masalah. Ini memudahkan pengendalian dan pencarian untuk digunakan apabila diperlukan. Malahan pada masa kini juga, para ilmuwan Islam hanya menggunakan CD untuk mencari maklumat tentang permasalahan yang timbul. Sudah pasti hal yang berkaitan dengan penyimpanan dan ruang yang diperlukan ketika menggunakan buku-buku adalah berbeza. Bahkan, jika maklumat yang dicari tidak dapat diperolehi daripada CD, mereka menggunakan talian internet dalam melayari laman web yang boleh memberikan maklumat tentang permasalahan yang dicari.

Daripada pemahaman ini, dapat disimpulkan bahawa kecanggihan teknologi ini dapat membantu penceramah dan penyelidik mendapatkan hadith yang dikehendaki dengan mudah. Maklumat tersebut juga mampu diperolehi dalam waktu yang singkat. Kekurangan penghafal hadith mutakhir ini, memaksa masyarakat Islam mencari alternatif lain demi menyelamatkan maruah Islam di mata dunia. Bahkan juga masyarakat kini perlu peka dengan perkembangan semasa agar kita tidak ketinggalan dengan arus teknologi.

Program pengumpulan hadith-hadith saih yang diriwayatkan oleh dua imam ini iaitu Al-Bukhari dan Muslim dalam bab iman akan menjadi buku atau sumber bekalan penting dan utama. Kehujahan hadith-hadith yang diriwayatkan oleh kedua-duanya sangatlah kuat dan mampu dijadikan sumber untuk menyelesaikan segala permasalahan yang timbul. Dengan kecanggihan teknologi terkini, kebanyakan hadith-hadith yang sukar diperolehi terutama hadith-hadith yang diriwayatkan oleh kedua-dua perawi ini akan dapat diatasi dengan penggunaan CD ataupun melayari laman webnya sahaja, kemudian hanya *copy* ke dalam file sendiri, seterusnya dapat dijadikan hujah tanpa perlu menaip semula dan menterjemahkannya semula.

Apatah lagi apabila projek ini kalau dikembangkan lagi ke bidang-bidang lain nanti seperti dalam bidang aqidah mahupun syariah tetapi masih dalam konteks permanfaatan kepada umum seperti dalam bidang pendidikan, perniagaan, muamalat, dan lain-lain lagi. Dalam konteks dunia sekarang, manusia perlu dilengkapkan dengan segala kemudahan yang boleh menjuruskan dirinya kepada jalan yang satu. Walau apa sekali pun cara, keimanan itu amat penting, justeru penyelidikan yang dilakukan ini memfokuskan bab iman dan akidah yang diriwayatkan oleh Imam Al-Bukhari dan Muslim. Hadith-hadith yang diriwayatkan adalah sahih sahaja yang diterima dan segala penyelidikan dijalankan dengan teratur dan terperinci. Mudah-mudahan penyelidikan ini akan memberi manfaat kepada setiap peringkat umat sebagai sumber rujukan selamat dan mudah. Dengan ini ia akan mampu mempercepatkan kebangkitan dan ketamadunan umat Islam dan alam sejagat umumnya.

## BIBLIOGRAFI

Abu Lubabah Husein, (1988), *al-Jurh Wa ta'dil*, Terengganu., Yayasan Islam Terengganu.

Al-Khathib, M. 'Ajaj, Dr. (1999), *Keutamaan Ilmu-Ilmu Hadis*, Johor Bharu, Badan Cemerlang.

Al-Shiddieqy, T.M. Hasbi Prof. Dr. (1987), *Pokok-pokok Ilmu Dirayah Hadith*, Jakarta, Penerbit Bulan Bintang.

Buda @ Odah, (1995), *Ulumul Hadis*, Kuala Lumpur, Perpustakaan Negara Malaysia.

Huda Muhsin, (1985), *Pengenalan Hadith as-Sunan as-Sittah*, Kuala Lumpur, Dewan Bahasa dan Pustaka.

Mahmud Yunus, Prof. Dr. H., (t.t) *Tafsir Quran Karim*, Selangor, Klang Book Centre

M. Syuhudi Ismail, Dr. ( 1987), *Kaedah Kesahihan Hadis*, Selangor, Thinkers Library. Pustaka Media Jaya.

Zulkifli Ahmad, (1996), *Pendidikan Al-Qur'an dan As-Sunnah*, Perak

PC CD-ROM, Kumpulan Hadis Riwayat Bukhory & Muslim, *Al-Qur'an 6.50 & al-Hadis* (Versi Indonesia)

PC CD-ROM, Quran Collection, *Muqadamat al-Qur'an – al-Bayan – Hadith, M 029*.

ust wan  
w a n

G,

M9 0

u s t

ust wan  
w a n

G,

M9 0

u s t

ust wan  
w a n

G,

M9 0

u s t

ust wan  
w a n

G,

M9 0

u s t